

ASO LUA, 19 AOKUSO 2014

Na tauaofia le Fono Aoao Faitulafono i le itula e 9:00 i le taeao e tusa ai ma le Polokalame o Fonotaga a le Palemene 2014.

Na nofoia le Nofoa e le Fofoga Fetalai i le itula e 9:00 i le taeao.

Tatalo.

MALELEGA MAI LE AO O LE MALO

Na fofogaina e le Fofoga Fetalai Malelega mai Lana Afioga Mamalu, O Le Ao o le Malo.

1. **“TUSI mo:**

Le Fofoga Fetalai:

E tusa ai ma le Mataupu 59 o le Faavae o le Malo Tutoatasi o Samoa faapea Tulafono Tumau 95 a le Palemene ua tuuina atu nei le maliega i le Fono Aoao Faitulafono na te iloiloaina ai Tulafono Tau Faaofi ua faaalua i inei:

1. Tulafono Tau Faaofi o Teuteuga o le Tulafono o le Pulega o Tupe a le Malo 2014.
2. Tulafono Tau Faaofi o le Ofisa Autu o Mataupu Faaletulafono mo Tagata Lautele 2014.
3. Tulafono Tau Faaofi o le Fono a le Au Tusitala ma le Au Faasalalau 2014.
4. Tulafono Tau Faaofi o le Ofisa o le Tiute 2014.
5. Tulafono Tau Faaofi o Teuteuga o le Tulafono o le Faaputugatupe mo le Lumanai Manuia o Tagata 2014.

TUUIINA ATU i lou nei Lima i lenei aso 18 o Aokuso i le tausaga 2014.

(Sainia): Tui Atua Tupua Tamasese Efi
OLE AO O LE MALO.

2. **TUSI FAAMAONIA O LE TULAGA FAANATINATI.**

E tusa ai ma aiaiga o le Tulafono Tumau 99(2) **O AU, TUI ATUA TUPUA TAMASESE EFI, O LE AO O LE MALO**, ua ou tuuina atu nei le Tusi Faamaonia o le Tulaga Faanatinati o le Tulafono Tau Faaofi ua faaali atu iinei mo le tagofia e le Fono Aoaofaitulafono i lana Fonotaga o le a usua i le Aso Lua, 19 Aokuso 2014.

1. Tulafono Tau Faaofi o le Ofisa o le Tiute 2014.

TUUIINA ATU i lou nei Lima i lenei aso 18 o Aokuso i le tausaga 2014.

**(Sainia): Tui Atua Tupua Tamasese Efi
O LE AO O LE MALO.**

SAUNOAGA O MALIU

1. *Na faasilasila e le Fofoga Fetalai le tuumalo o le **Tofa TUILOA Anetelea**, o Le sa avea ma sui usufono mo le Itumalo Faaalaalafaga o Gagaifomauga Nu.1.
Na uluai filifilia mai le **Tofa TUILOA Anetelea** i le Palemene Lona XIV, tausaga 2006-2011.
Na toe filifilia mai le **Tofa TUILOA Anetelea** i le Palemene Lona XV i le tausaga 2011 – seia oo mai i le aso 9 Iuni 2014 lea na tuumalo ai.
Sa avea le **Tofa TUILOA Anetelea** ma Minisita Lagolago i le Matagaluega o Tina ma Tamaitai, Atinae o Nuu ma Afioaga ma Agafesootai.
Sa avea foi o Ia ma sui usufono o le Komiti o Mataupu tau Aoga, Saienisi, Fesootaiga ma Faamatalaga Tekonolosi, o le Komiti o Oloa Gaosia Tulaga Muamua, Mataupu Tau Pisinisi, Alamanuia ma Leipa faapea le Komiti o Tulaga Aloaia ma Amio Taualoa a le Palemene.*
2. *Na faapea foi ona faasilasila e le Fofoga Fetalai le tuumalo o le **Afioga SAVEA Sione**, o Le sa avea ma sui usufono o le Itumalo Faaalaalafaga o Anoamaa Sasae.
Na filifilia mai le **Afioga SAVEA Sione** i le Palemene Lona VIII i le tausaga 1982-1985.
Sa avea o Ia ma sui usufono o le Komiti o Palemene a Malo o le Taupulega faapea le Komiti o Tulaga Aloaia ma Amio Taualoa a le Palemene.*
3. *Na faapea foi ona faasilasila e le Fofoga Fetalai le tuumalo o le **Afioga AIONO Fanaafi**, o Le sa avea ma sui usufono o le Itumalo*

Faaalaalafaga o Aana Alofi Nu.1, na tuumalo i le aso 6 Aokuso 2014.

*Na filifilia mai le **Afioga AIONO Fanaafi** e avea ma sui usufono o le Itumalo Faaalaalafaga o Aana Alofi Nu.1 i le Paeaiga o le 1985-1988.*

Sa avea foi o Ia ma sui usufono o le Komiti o Tulaga Aloaia ma Amio Tualoa a le Palemene.

Na tutulai filemu le Maota mo le minute e tasi e faailoa ai lo latou faaaloalo i sui usufono ua tuumalo.

FOFOGA FETALAI: Ou te manatu o lea ua tini pao le uto e pei o le faiva i Tapalega, e manatu foi o lea ua sausu fiaele le manu nai Utufiu aua o lea ua Lalagofaatasi le Igoaipu a Sa-Tupua i lenei taeao fou ma ua Fetaiamauso. Ua tatou fesilafai i tai malama i le alofa ma le agalelei o lo tatou Tapaau Sili i le lagi.

Ou te ofo alofa atu ma ou faatalofa atu i le paia maualuga o lo tatou Palemene i ona tulaga faalupelupe i le alafai mai i faguga lelei o lo outou paia ma lo outou mamalu aua o outou lava o Fuesinaloloa ma Tootouli o Samoa. Ua tatou toe aofaga potopoto i lenei taeao fou i le malae o taegamamanu a Samoa i Tiafau. Ou te faamalo atu le soifua manuia; malo le soifua maua. E faafetai i lenei taeao fou ona ua tatou potopoto ai aua o le aso na atofa, o le aso na faalagi, o le asō o le a tatou toe faatasi ai aua le tauavameaina o a tatou galuega faaauau.

E faafetai i le Atua ona ua vaai atu sulu o le tino o lo o atoa pea pulu fagota o lo tatou Sa. O lea ua sauni le Sa tele e folau, e talitonu o le alofa ma le agalelei o le Atua ua tatou tau ai i manū i lenei taeao fou i le soifua manuia lau Afioga i le Taitai o le Malo ma lau Kapeneta mamalu. O lo o ee foi le tapuaiga maualuga a lau Afioga i le Taitai o le Itu Agai ma lea tala-na-atoa aemaise o sui usufono mamalu uma o le Palemene ua aofaga potopoto i lenei taeao. Ua malo le folau, ua malo le soifua manuia ona ua tatou fesagai i le alofa ma le agalelei o le Atua i luma o le nuu.

Ou te ofo alofa atu foi i le paia ma le mamalu o Samoa ua tatou faatasi i lenei aso i tupu ma ee, tamalii ma failauga, faletua ma tausii, saoa ma tamaitai ma Samoa ua potopoto seia oo i a tatou fanau pele.

O lo o faaauauina pea le tatou Polokalame Faalauiloa mo outou alo ma fanau a lo tatou atunuu, o lea ua outou taunuu mai i totonu i le malae e fai ai tonufai o Samoa, ua fa'i mai i ai lupe o fuifui o manū, o e ua pale mai i Salafa latou te le solia Vasaga, ae agai mai ma le talitonuga e ofo o latou soifua aua le tautuaina o Samoa ma ona Upufai o Malo.

E tele taeao ae le lau taeao, e tele foi aso ae le lau aso, e le faia mo i matou le Maota lenei. O outou o tupulaga lalovaoa o Samoa tou te mataitu aua o outou o le faata mo le lumanai, e sau outou taeao, a o nei e faufau ai manuia aemaise manū mo Samoa aua le faaauauina o le atiaaina, aemaise le tapuaiga a le aufai tatalo mo Samoa i le lumanai.

Ia alo i outou faiva-manuia, ou te faafeiloai atu e fai ai lou leo ma fofoga tau momoli o lenei Palemene, matou te ofo alofa atu ma faatalofa atu i tulaga aloaia.

E manatu foi e le o toe po malaē, o lea ua taunuu i fanua le Sa folau o le paia maualuga aua le Itumalo o Sa Moeleoi, Tapaau ma Alataua i le Vaiti ma

le Vaimalae. E faigata le asō i le taunuu mai ona o le faataunuuina o se faaaloalo e ala atu i le sui usufono mamalu, Afioga i le Minisita, Afioga Hon Lautafi Fio Selafi Purcell. E le faigofie o lea ua opea i le Malae i Tiafau le paia maua o le itumalo i ona tulaga faalupelupe. Ua ou manatu ai ma lou agaga faaaloalo, o le a se i vavae foe, o le a se i o tatou agai i lumafale se i tali le afifio mai ma le tala mai o aao ona e alofa foi, e nofo ae olo ona e mamao Salafai i le mea e malaga mai ai i latou. A o le a faataunuuina tulaga i le maliu mai ma le masii mai o le fala siigata aua le paia o le itumalo, o a tatou tu ia ma aganuu faa-Samoa. E ta te taliu ae popoe ona o lea ua taunuu se tasi o tootoouli o le Nofo-a-Pule. E tatau foi ona tatou fai mea fuafua ma tatou manatunatu aua e fai foi o faiva o pule a o faiva o faaaloalo.

Ona ou manatu ai lea lau Afioga i le Taitai o le Malo aemaise le paia o lo tatou Maota Fono nei, o le a vavae foe o le tatou Fono. O le a tatou o atu i lumafale se i faatea le tulaga lea na masii mai ai le fala siigata i le itumalo o Satupaitea, ona tatou omai lea o tatou e omiomi a tatou galuega ae ua avanoa i latou mo le toe malaga atu i Savaii.

Ou te faasilasila atu o le a faatatiease Taulumaga a le Fono Aoaofaitulafono ona o nisi o fuafuaga taua.

Na faataatiease Galuega a le Fono Aoaofaitulafono i le itula e 9.22 i le taeao ma toe faaauau i le itula e 11.16 i le taeao.

FOFOGA FETALAI: Ou te faasilasila atu ua toe amatalia nei Taulumaga a le Fono Aoaofaitulafono.

Ou te momoli atu le faafetai ma le faamalo i lenei vaega o le aso i le tapuaiga mau aemaise foi o le lavapapale o le tatou Maota ona o nisi fuafuaga taua o lea faatoa tatou toe taliu mai talu mai le amataina o le tatou Fonotaga i le aso analeila. Ia e i ai le talitonuga e vaatele i lo outou finagalo ona o nisi foi o tulaga taua e le tuua isi mea lelei mo isi faamoemoega manuia, ona o le faamoemoe o le taunuu mai o le itumalo o Satupaitea, aemaise foi le polokalame faalauiloa i alo ma fanau a le tatou atunuu, ia faatoa taliu mai nei le Taitai o le Malo ma le Afioga i le Taitai o le Itu Agai, ia ma au nei o le Fofoga Fetalai. E momoli atu ai le faafetai tele ona o le logosaia o le tatou faatulagaga o le tatou taimi, ona o lea ua tatou maitauina le tele ma le anoanoai o tuatua ia ma polokalame faataatia.

Ae ui o lea, e i ai le talitonuga ua vaatele i o outou finagalo le faasologa o le tatou polokalame.

E faaleoina ma le agaga faaaloalo le tapuaiga a Samoa aemaise le faaaloalo maua o lea afio mai ai le paia o le itumalo ia Satupaitea, mamalu aua le afio ia te oe le Vaiti ma le Vaimalae Asiata, nofo vafealoaloa i lo outou aiga, mamalu ia Samoeleoi ma le Alataua ma Tapaau, ia e aveva lou leo e fai ma fofoga taumomoli o lena ua fetalai atu Leulumoeaga i tiute ma faaaloaloga i le aso, ia matou te le selu atu. O tulaga o le faaaloalo i lenei aso, o lea ua taumamafa ma le tali le sua a le Palemene, e le gata i lea ua tala ie o auafa ma ie o malo ma fua o faaaloalo, ona o le manatu i lau Afioga i le Minisita.

E momoli atu le faafetai tele e ui atu i lau Afioga i le Minisita ma le paia o le itumalo, faamalo le faatupu, faamalo le faatamalii i lenei vaega o le aso.

TUUINA ATU O PEPA

Na tolaulauina e le Failautusi Pepa nei ua faataatia i luga o le Laulau a Fono, e tusa ai ma le T.T.48.

1. P.P. 2014/2015 Nu. 59, Lipoti Faaletausaga a le Matagaluega o Tina ma Tamaitai, Atinae o Nuu, Afioaga ma Agafesootai mo le Tausaga Faaletupe faaiiuna aso 30 Iuni 2013.
2. P.P. 2014/2015 Nu. 60, Tali atu a le Malo i le P.P. 2013/2014 Nu. 130, Lipoti a le Komiti mo Ofisa o le Palemene i le P.P. 2012/2013 Nu. 73, Lipoti i le Palemene a le Ofisa o le Komesina o Sulufaiga e tau i le aso 30 Iuni 2012.
3. P.P. 2014/2015 Nu. 61, Tali atu a le Malo i le P.P. 2013/2014 Nu. 96, Lipoti a le Komiti o Mataupu tau Aoga, Saienisi, Fesootaiga ma Faamatalaga Tekonolosi i le P.P. 2013/2014 Nu. 20, Lipoti Faaletausaga a le Iunivesite Aoao o Samoa mo le Tausaga Faaletupe faaiiuna aso 30 Iuni 2011.
4. P.P. 2014/2015 Nu. 62, Tali atu a le Malo i le P.P. 2013/2014 Nu. 63, Lipoti a le Komiti o Mataupu tau Aoga, Saienisi, Fesootaiga ma Faamatalaga Tekonolosi i le P.P. 2011/2012 Nu. 55, Lipoti Faaletausaga a le Iunivesite Aoao o Samoa mo le Tausaga Faaletupe faaiiuna aso 30 Iuni 2010.
5. P.P. 2014/2015 Nu. 63, Tali atu a le Malo i le P.P. 2013/2014 Nu. 121, Lipoti a le Komiti o Galuega, Felauaiga ma Siosiomaga i le P.P. 2013/2014 Nu. 121, Lipoti a le Komiti o Galuega, Felauaiga ma Siosiomaga i le P.P. 2013/2014 Nu. 5, Lipoti Faaletausaga a le Faalapotopotoga o le Malosi Faa-Eletise mo le Tausaga Faaletupe faaiiuna aso 30 Iuni 2012.
6. P.P. 2014/2015 Nu. 64, Tali atu a le Malo i le P.P. 2013/2014 Nu. 119, Lipoti a le Komiti o Galuega, Felauaiga ma Siosiomaga i le P.P. 2013/2014 Nu. 4, Faamatalaga o Sini Autu a le Faalapotopotoga o le Malosi Faa-Eletise mo le vaitaimi 2013-2015.
7. P.P. 2014/2015 Nu. 65, Lipoti Faaletausaga a le Pulega o Uafu ma Taulaga mo le tausaga 2012.
8. P.P. 2014/2015 Nu. 66, Lipoti Faaletausaga a le Ofisa Tausi Mavaega a le Malo mo le Tausaga faaiiuna aso 30 Iuni 2009.
9. P.P. 2014/2015 Nu. 67, Lipoti Faaletausaga a le Ofisa Tausi Mavaega a le Malo mo le Tausaga faaiiuna aso 30 Iuni 2010.
10. P.P. 2014/2015 Nu. 68, Lipoti Faaletausaga a le Ofisa Tausi Mavaega a le Malo mo le Tausaga faaiiuna aso 30 Iuni 2011.
11. P.P. 2014/2015 Nu. 69, Tali atu a le Malo i le P.P. 2013/2014 Nu. 88, Lipoti a le Komiti o Tupe Maua ma Tupe Totogi i le P.P. 2013/2014 Nu. 21, Lipoti Faaletausaga a le Faalapotopotoga Inisiua tau Soifua a Samoa mo le Tausaga Faaletupe 2011/2012.
12. P.P. 2014/2015 Nu. 70, Tali atu a le Malo i le P.P. 2013/2014 Nu. 65, Lipoti a le Komiti o Mataupu tau Aoga, Saienisi, Fesootaiga ma Faamatalaga Tekonolosi i le P.P. 2011/2012 Nu. 58 & P.P. 2011/2012 Nu. 59, Fuafuaga Autasi a le Falemeli o Samoa mo le vaitaimi 2012-2014.

13. P.P. 2014/2015 Nu. 71, Tali atu a le Malo i le P.P. 2013/2014 Nu. 100, Lipoti a le Komiti o Mataupu tau Aoga, Saienisi, Fesootaiga ma Faamatalaga Tekonolosi i le P.P. 2012/2013 Nu. 57, Fuafuaga Autasi Falemeli o Samoa 2013-2015 & P.P. 2012/2013 Nu. 58, Faamatalaga o Sini Autasi a le Falemeli o Samoa 2013-2015.
14. P.P. 2014/2015 Nu. 72, Tali atu a le Malo i le P.P. 2013/2014 Nu. 124, Lipoti a le Komiti o Faafoega tau Pulega a le Malo i le P.P. 2011/2012 Nu. 42, Lipoti Faaletausaga a le Falemeli o Samoa mo le Tausaga Faaletupe 2009/2010.
15. P.P. 2014/2015 Nu. 73, Lipoti i le Palemene a le Ofisa o le Komesina o Sulufaiga mo Tausaga Faaletupe 30 Iuni 2013 & 30 Iuni 2014.
16. P.P. 2014/2015 Nu. 74, Tali atu a le Malo i le P.P. 2013/2014 Nu. 120, Lipoti a le Komiti o Ofisa o le Palemene i le P.P. 2012/2013 Nu. 5 & P.P. 2013/2014 Nu. 2, Lipoti Faaletausaga o le Penisione o le Palemene mo le Tausaga 2010/2011 ma le Tausaga 2011/2012.
17. P.P. 2014/2015 Nu. 75, Tali atu a le Malo i le P.P. 2013/2014 Nu. 66, Lipoti a le Komiti o Mataupu tau Aoga, Saienisi, Fesootaiga ma Faamatalaga Tekonolosi i le P.P. 2012/2013 Nu. 6, P.P. 2012/2013 Nu. 7 & P.P. 2012/2013 Nu. 8, Lipoti Faaletausaga a le Matagaluega o Aoga, Taaloga ma Aganuu mo Tausaga Faaletupe 2008/2009, 2009/2010 ma le 2010/2011.
18. P.P. 2014/2015 Nu. 76, Tali atu a le Malo i le P.P. 2013/2014 Nu. 136, Lipoti a le Komiti o le Soifua Maloloina, Galuega tau le Va Fealoai, Mataupu tau Lotoifale ma Atinae o Afioaga ma Agafesootai i le P.P. 2012/2013 Nu. 55 & P.P. 2013/2014 Nu. 74, Lipoti Faaletausaga a le Faaputugatupe mo le Lumanai Manuia o Tagata Samoa 2012 ma le tausaga 2013.
19. P.P. 2014/2015 Nu. 77, Tali atu a le Malo i le P.P. 2013/2014 Nu. 115, Lipoti a le Komiti o le Soifua Maloloina, Galuega tau le Va Fealoai, Mataupu tau Lotoifale ma Atinae o Afioaga ma Agafesootai i le P.P. 2013/2014 Nu. 73, Faamatalaga o galuega ma Tala o Tupe a le Faaputugatupe mo Faamanuiaga mo Tagata Matutua i Samoa 2012/2013.
20. P.P. 2014/2015 Nu. 78, Lipoti Faaletausaga a le Pulega o Tupe Faava o Malo mo le tausaga 2013.
21. P.P. 2014/2015 Nu. 79, Tali atu a le Malo i le P.P. 2012/2013 Nu. 87, Lipoti a le Komiti o Galuega, Felauaiga ma Siosiomaga i le P.P. 2011/2012 Nu. 61, Fuafuaga Autasi ma Faamatalaga o Sini Auta a le Pulega o le Suavai mo le vaitaimi 2012-2014.
22. P.P. 2014/2015 Nu. 80, Tali atu a le Malo i le P.P. 2013/2014 Nu. 134, Lipoti a le Komiti o Mataupu tau Aoga, Saienisi, Fesootaiga ma Faamatalaga Tekonolosi i le P.P. 2012/2013 Nu. 23, P.P. 2012/2013 Nu. 78 & P.P. 2012/2013 Nu. 79, Lipoti Faaletausaga a le Pulega o Fale ma Malae Taalo a Samoa 2008/2009, 2009/2010 & 2010/2011.
23. P.P. 2014/2015 Nu. 81, Lipoti Faaletausaga a le Faalapotopotoga o Eleele Tumaoti a le Malo mo le Tausaga Faaletupe 2005-2006.
24. P.P. 2014/2015 Nu. 82, Lipoti Faaletausaga a le Faalapotopotoga o Eleele Tumaoti a le Malo mo le Tausaga Faaletupe 2006-2007.
25. P.P. 2014/2015 Nu. 83, Lipoti Faaletausaga a le Faalapotopotoga o Eleele Tumaoti a le Malo mo le Tausaga Faaletupe 2007-2008.

26. P.P. 2014/2015 Nu. 84, Lipoti Faaletausaga a le Faalapotopotoga o Eleele Tumaoti a le Malo mo le Tausaga Faaletupe 2008-2010.
27. P.P. 2014/2015 Nu. 85, Lipoti Faaletausaga a le Faalapotopotoga o Eleele Tumaoti a le Malo mo le Tausaga Faaletupe 2010-2012.
28. P.P. 2014/2015 Nu. 86, Tali atu a le Malo i le P.P. 2013/2014 Nu. 118, Lipoti a le Komiti o le Soifua Maloloina i le P.P. 2013/2014 Nu. 46, Lipoti Faaletausaga a le Faalapotopotoga o Mea tau Fale a Samoa mo le Tausaga 2012.
29. P.P. 2014/2015 Nu. 87, Tali atu a le Malo i le P.P. 2013/2014 Nu. 123, Lipoti a le Komiti o Mataupu tau Aoga, Saienisi, Fesootaiga ma Faamatalaga Tekonolosi i le P.P. 2012/2013 Nu. 11 & P.P. 2013/2014 Nu. 39, Lipoti Faaletausaga a le Faalapotopotoga o Suesuega Faasaienisi a Samoa mo le Tausaga Faaletupe faaiuina aso 30 Iuni 2011 ma le aso 30 Iuni 2012.
30. P.P. 2014/2015 Nu. 88, Tali atu a le Malo i le P.P. 2013/2014 Nu. 64, Lipoti a le Komiti o Mataupu tau Aoga, Saienisi, Fesootaiga ma Faamatalaga Tekonolosi i le P.P. 2011/2012 Nu. 56, Fuafuaga Autasi a le Faalapotopotoga o Suesuega Faasaienisi a Samoa mo le vaitaimi 2012-2014.
31. P.P. 2014/2015 Nu. 89, Tali atu a le Malo i le P.P. 2013/2014 Nu. 62, Lipoti a le Komiti o Mataupu tau Aoga, Saienisi, Fesootaiga ma Faamatalaga Tekonolosi i le P.P. 2011/2012 Nu. 34, Lipoti Faaletausaga a le Faalapotopotoga o Suesuega Faasaienisi a Samoa mo le Tausaga Faaletupe faaiuina aso 30 Iuni 2010.
32. P.P. 2014/2015 Nu. 90, Tali atu a le Malo i le P.P. 2013/2014 Nu. 101, Lipoti a le Komiti o le Soifua Maloloina i le P.P. 2012/2013 Nu. 12, Lipoti Faaletausaga a le Faalapotopotoga Faavae tau Fatugao a Samoa mo le Tausaga faaiuina aso 30 Iuni 2011.
33. P.P. 2014/2015 Nu. 91, Tali atu a le Malo i le P.P. 2012/2013 Nu. 89, Lipoti a le Komiti o le Soifua Maloloina i le P.P. 2011/2012 Nu. 29, Lipoti Faaletausaga a le Faalapotopotoga Faavae tau Fatugao a Samoa mo le Tausaga Faaletupe faaiuina aso 30 Iuni 2010.
34. P.P. 2014/2015 Nu. 92, Lipoti Faaletausaga a le Komisi o le Toefuataiga o Tulafono a Samoa Iulai 2012-Iuni 2013.
35. P.P. 2014/2015 Nu. 93, Lipoti a le Komisi o le Toefuataiga o Tulafono a Samoa i le Tulafono o Falepuipui 1967, Lipoti Mulimuli 04/11.
36. P.P. 2014/2015 Nu. 94, Lipoti Faaletausaga a le Faalapotopotoga o Suesuega Faasaienisi a Samoa mo le Tausaga 2012-2013.
37. P.P. 2014/2015 Nu. 95, Lipoti Faaletausaga Nu. 50 a le Faalapotopotoga o Esetete Tausi a Samoa mo le Tausaga Faaletupe faaiuina aso 30 Iuni 2012.
38. P.P. 2014/2015 Nu. 96, Tali atu a le Malo i le P.P. 2012/2013 Nu. 95, Lipoti a le Komiti o le Soifua Maloloina i le P.P. 2011/2012 Nu. 94, Lipoti Faaletausaga a le Matagaluega o le Soifua Maloloina mo le Tausaga Faaletupe faaiuina aso 30 Iuni 2010.
39. P.P. 2014/2015 Nu. 97, Tali atu a le Malo i le P.P. 2013/2014 Nu. 128, Lipoti a le Komiti o Galuega, Felauaiga & Siosiomaga i le P.P. 2012/2013 Nu. 24, P.P. 2013/2014 Nu. 22 & P.P. 2013/2014 Nu. 23,

- Lipoti Faaletausaga a le Pulega o le Suavai mo le Tausaga faaiuina aso 30 Iuni 2010, 30 Iuni 2011 ma le 30 Iuni 2012.
40. P.P. 2014/2015 Nu. 98, Tali atu a le Malo i le P.P. 2013/2014 Nu. 129, Lipoti a le Komiti o Galuega, Felauaiga ma Siosiomaga i le P.P. 2014/2015 Nu. 7, Faamatalaga o Sini Autu a le Pulega o le Suavai mo le vaitaimi 2013-2015.
 41. P.P. 2014/2015 Nu. 99, Tali atu a le Malo i le P.P. 2013/2014 Nu. 135, Lipoti a le Komiti o Mataupu tau Aoga, Saienisi, Fesootaiga ma Faamatalaga Tekonolosi i le P.P. 2013/2014 Nu. 24 & P.P. 2013/2014 Nu. 25, Lipoti Faaletausaga a le Ofisa o le Pule Faatonu mo Tausaga faaiuina aso 30 Iuni 2009 ma le 30 Iuni 2010.
 42. P.P. 2014/2015 Nu. 100, Tali atu a le Malo i le P.P. 2013/2014 Nu. 114, Lipoti a le Komiti o le Soifua Maloloina, Galuega tau le Va Fealoai, Mataupu tau Lotoifale ma Atinae o Afioaga ma Agafesootai i le P.P. 2012/2013 Nu. 16 & P.P. 2013/2014 Nu. 1, Lipoti Faaletausaga a le Matagaluega o Tina ma Tamaitai, Atinae o Afioaga ma Agafesootai mo Tausaga faaiuina aso 30 Iuni 2011 ma le 30 Iuni 2012.

FOFOGA FETALAI: Malo faafetai.

TUUINA ATU O LIPOTI A KOMITI FILIFILIA

Na tolaulauina e le Failautusi Lipoti a Komiti Filifilia nei ua faataatia i luga o le Laulau a Fono e tusa ai ma T.T.51(5).

1. P.P. 2014/2015 Nu. 101, Lipoti a le Komiti o Mataupu tau Faamasinoga, Leoleo & Falepuipui ma Faamasinoga o Fanua ma Suafa i le Tulafono Tau Faaofi mo Loia ma le Faatinoga o Galuega Faaloia 2012.
2. P.P. 2014/2015 Nu. 102, Lipoti a le Komiti o Tupe Maua ma Tupe Totogi i le P.P. 2014/2015 Nu. 5, Lipoti Faaletausaga a le Pulega o Tupe Faava o Malo a Samoa mo le Tausaga 2012.
3. P.P. 2014/2015 Nu. 103, Lipoti a le Komiti o Tupe Maua ma Tupe Totogi i le P.P. 2014/2015 Nu. 8, Lipoti Faaletausaga a le Faalapotopotoga Inisiua tau Soifua a Samoa mo le Tausaga 2013.
4. P.P. 2014/2015 Nu. 105, Lipoti a le Komiti o Mataupu tau le Va i Fafu i le Tulafono Tau Faaofi o Teuteuga o le Tulafono o le Fafoega o Lafoga 2014.
5. P.P. 2014/2015 Nu. 106, Lipoti a le Komiti o Mataupu tau Faamasinoga, Leoleo & Falepuipui ma Faamasinoga o Fanua & Suafa i le Tulafono Tau Faaofi o Teuteuga o le Tulafono o le Faamasinoga a le Lalolagi i Solitulafono Faava o Malo 2014.

**TULAFONO TAU FAAOFI O TEUTEUGA O LE TULAFONO O LE
PULEGA O TUPE A LE MALO 2014 – faitauga muamua**

FOFOGA FETALAI: Tulai mai lau Afioga i le Palemia le Minisita o Tupe.

Susuga Hon TUILAEPA FATIALOFA LUPESOLIAI AIONO NEIOTI SAILELE MALIELEGAOI (Palemia, Minisita o Tupe): Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o le Pulega o Tupe a le Malo 2014 i lona faitauga muamua.*

Faaluaina e le Sui Palemia, Minisita mo Galuega Tau Alamanuia ma Atinae a le Malo, Minisita mo Fesootaiga ma Faamatalaga Tekonolosi ma le Minisita mo Tina ma Tamaitai, Atinae o Nuu ma Afioga ma Agafesootai.

Na faamaonia le lafo ma faitauina le Tulafono Tau Faaofi i lona faitauga muamua.

FOFOGA FETALAI: E tusa ai ma le Tulafono Tumau o le a faatulaga le Tulafono Tau Faaofi i lona faitauga faalua i le aso Fono lona tolu e mulimuli mai.

**TULAFONO TAU FAAOFI O LE OFISA AUTU O MATAUPU
FAALETULAFONO MO TAGATA LAUTELE 2014
– faitauga muamua**

FOFOGA FETALAI: Tulai mai lau Afioga i le Minisita mo Faamasinoga ma Pulega Tau Faamasinoga.

Afioga Hon FIAME NAOMI MATAAFA (Minisita mo Faamasinoga ma Pulega Tau Faamasinoga): Lau Afioga i le Fofoga Fetalai, ou te faatu le lafo, *Ina ia faitauina nei le Tulafono Tau Faaofi o le Ofisa Autu o Mataupu Faaletulafono mo Tagata Lautele 2014 i lona faitauga muamua.*

Faaluaina e le Afioga i le Sui Palemia.

Na faamaonia le lafo ma faitauina le Tulafono Tau Faaofi i lona faitauga muamua.

FOFOGA FETALAI: E tusa ai ma le Tulafono Tumau o le a faatulaga le Tulafono Tau Faaofi mo lona faitauga faalua i le aso Fono lona tolu e mulimuli mai.

**TULAFONO TAU FAAOFI O LE FONO A LE AU TUSITALA MA LE
AU FAASALALAU 2014 – faitauga muamua**

FOFOGA FETALAI: Tulai mai lau Afioga i le Palemia.

Susuga Hon TUILAEPa FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o le Fono a le Au Tusitala ma le Au Faasalalau 2014 i lona faitauga muamua.*

Faaluaina e le Afioga i le Sui Palemia ma le Minisita mo Tina ma Tamaitai, Atinae o Nuu ma Afioga ma Agafesootai.

Na faamaonia le lafo ma faitauina le Tulafono Tau Faaofi i lona faitauga muamua.

FOFOGA FETALAI: E tusa ai ma Tulafono Tumau, o le a faatulaga le Tulafono Tau Faaofi mo lona faitauga faalua i le aso fono lona 3 e mulimuli mai.

TULAFONO TAU FAAOFI O LE OFISA O LE TIUTE 2014
– faitauga muamua

FOFOGA FETALAI: Tulai mai lau Afioga i le Minisita mo Tupe Maua.

Tofa Hon TUILOMA LAMEKO (Minisita mo Tupe Maua): Lau Afioga i le Fofoga Fetalai ua ou tulai atu ma le faaaloalo e faatu le lafo, *Ina ia faitauina nei le Tulafono Tau Faaofi o le Ofisa o le Tiute 2014 i lona faitauga muamua.*

Faaluaina e le Afioga i le Sui Palemia ma le Minisita mo Tina ma Tamaitai, Atinae o Nuu ma Afioga ma Agafesootai.

Na faamaonia le lafo ma faitauina le Tulafono Tau Faaofi i lona faitauga muamua.

TULAFONO TAU FAAOFI O TEUTEUGA O LE TULAFONO O LE FAAPUTUGATUPE MO LE LUMANAI MANUIA O TAGATA 2014
– faitauga muamua

FOFOGA FETALAI: Tulai mai lau Afioga i le Palemia.

Susuga Hon TUILAEPa FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o le Faaputugatupe mo le Lumanai Manuia o Tagata 2014 i lona faitauga muamua.*

Faaluaina e le Afioga i le Sui Palemia ma le Minisita mo Tina ma Tamaitai, Atinae o Nuu ma Afioga ma Agafesootai.

Na faamaonia le lafo ma faitauina le Tulafono Tau Faaofi i lona faitauga muamua.

FOFOGA FETALAI: E tusa ai ma Tulafono Tumau o le a faatulaga le Tulafono Tau Faaofi mo lona faitauga faalua i le aso Fono lona 3 e mulimuli mai.

**TULAFONO TAU FAAOFI O TEUTEUGA O LE TULAFONO O
FAAMALUMALUGA E FAAMAU AI MEATOTINO TAU LE
TAGATA LAVA IA 2014 – faitauga faalua**

FOFOGA FETALAI: Mo le silafia e le Palemene o le Tulafono Tau Faaofi lenei sa faia lona faitauga muamua i le aso fono 20/6/2014.

Tulai mai lau Afioga i le Minisita mo Pisinisi, Alamanuia ma Leipa.

Tofa Hon FONOTOE NUAFESILI PIERRE LAUOFO (Sui Palemia, Minisita mo Pisinisi, Alamanuia ma Leipa): Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Faamalumaluga e Faamau ai Meatotino Tau le Tagata lava Ia 2014 i lona faitauga faalua ma ou te fia tautala faamalamalama i ai.*

Faaluaina e le Minisita mo Faamasinoga ma Pulega Tau Faamasinoga ma le Minisita mo Tina ma Tamaitai, Atinae o Nuu ma Afioga ma Agafesootai.

FOFOGA FETALAI: Tulai mai lau Afioga i le Sui Palemia e saunua faamalamalama.

Tofa Hon FONOTOE NUAFESILI PIERRE LAUOFO: Faafetai lava i lau Afioga i le Fofoga Fetalai mo le avanoa.

O le Tulafono Autu sa pasia i le tausaga ua mavae atu e pei ona e saunua i ai. Ua faatulai mai la lenei Tulafono Tau Faaofi e Teuteu ai se vaega laititi o le Tulafono Autu lena. Ia manatua foi o le Tulafono Autu o lo o faavaeina ai le faatuina lea o se resitala eletoroni po o se electronic registry e faamauina ai meatotino tau i le tagata lava ia, aemaise lava mea nei o taavale afi. Ia faatulaga e mafai ona faamauina e nono ai ni tupe po o ni aitalafu mai faletupe. O le Tulafono Autu e pei o lo o mamafa lava i le faaaogaina o fuainumera ma isi tulaga faapena i se faaaliga lea e saili pe a e fia maua se faamatalaga i le tulaga i se aitalafu.

O le Tulafono Toe Teuteu la lenei o lea ua aumai ia faatauaina le suafa o le tagata e ana le aitalafu, ina ia faamauina le suafa o le e ana le aitalafu i luga o se faaaliga po o se faasilasilaga foi e maua mai i le Resitala Autu pe a maea ona faatuina.

E pei o se Teuteuga puupuu lea lau Afioga i le Fofoga Fetalai e tusa ai ma lenei Tulafono Tau Faaofi.

FOFOGA FETALAI: Ua faamalo atu le saunua faamalamalama i lau Afioga i le Sui Palemia i lea Tulafono Tau Faaofi. E vaavaai atu ua leai se isi masalo ua malamalama uma sui usufono mamalu e tusa o le Toe Teuteuga ona e le o se Teuteuga tele.

Afioga Hon Palusalue Faapo II (Taitai o le Itu Agai): Lau Afioga i le Fofoga Fetalai.....

FOFOGA FETALAI: O le a tuu atu pea le avanoa - tulai mai lau Afioga i le Taitai o le Itu Agai.

Afioga Hon PALUSALUE FAAPO II: E le umi foi se manatu, ae faafetai i lau Afioga i le Sui Palemia e tusa ai o nisi o mea ua toe faaopoopo ina ia maua ai e nai o tatou tagata le toomaga aua a latou aitalafu ae faamaonia i meatotino. O lea la ua tulai mai lau Afioga i le Fofoga Fetalai, o lea ua tuu atu i ai ma le igoa o le tagata e faatulafonoina ai aua lava le faamoemoe ina ia maua mai tupe e atiae ai le atunuu.

O lea la ua e saunoa manino o le tausaga talu ai na pasia ai le Tulafono Autu. O le ala la o lou tulai lau Afioga i le Fofoga Fetalai, po o le a se tala mai i lea tulaga, pe ua i ai ni faletupe ua latou talia ni aitalafu a nai o tatou tagata e faaogaina ai meatotino nei i Banks ia e pei o le ANZ, WSPAC ma isi bank faapena? Po o le a la se tala mai talu ona faatulai mai le Tulafono lea, aua e le faigofie i nai o tatou tagata ona o atu ma avatu ietoga, o maumaga ma tulaga faapena?

FOFOGA FETALAI: O lea ua maua atu lau Afioga i le Taitai o le Itu Agai, o lea o le a tali atu le Sui Palemia.

Tofa Hon Fonotoe Nuafesili Pierre Lauofo: E pei lava ona faamalalama atu i le taimi na faataatia ai i le Laulau a Fono le Tulafono Autu, o le Tulafono Autu sa faatalatalanoaina i se tulaga faalauaitele i totonu o le atunuu, sa aafia uma ai ma sui o faletupe o lo o i totonu o le atunuu. O le latou tala mai, o le tulaga tonu lea o lo o moomia e latou ina ia i ai so latou faatuatuaga i le nonoina atu lea o tupe e faamau i luga o meatotino faapenei e pei o taavale afi. O le tulaga la i le tala mai, ua matua fiafia lava faletupe i le mea lenei ua fai. O lea o le a fai le registry lea eletoroni e faamau uma ai taavale ma aitalafu nei ma numera o taavale. O lea la ua aumai ma le faataua o suafa o i latou ia e ana aitalafu. O le tulaga lena o lea o le a tulai mai i se tulaga maopoopo e faigofie ai ona saili ma e faigofie ai foi ona maua le tagata e ana le aitalafu.

O se fiafiaga tele foi lea ia i latou i faletupe ona o le a faafaigofieina ai foi a latou galuega ma maua ai foi e latou se faatuatuaga i lenei ituaiga system ina ia faafaigofie ai ona maua ni tupe nono atu i tagata, aemaiase nonogatupe ia aua ia silafia foi, e le o ni nonogatupe tetele nei nonogatupe e faamau i meatotino laiti faapenei. O le tele lava o nonogatupe laiti aua nai atinae po o ni faalavelave foi o tagata o le atunuu o lo o moomia se fesoasoani i na foi tulaga.

E pei o le tali atu lea lau Afioga i le Fofoga Fetalai.

Afioga Hon PALUSALUE FAAPO II: Lau Afioga i le Fofoga Fetalai.....

FOFOGA FETALAI: Se i toe tuu atu le avanoa i lau Afioga i le Taitai o le Itu Agai.

Afioga Hon PALUSALUE FAAPO II: Lau Afioga i le Fofoga Fetalai, faafetai tele lava i le faamalamalamaga a le Afioga i le Sui Palemia.

O nei mea o taavale e le o se mea fou, o mea lava ia sa faaaoga i aso la a o le i aumaia lenei Tulafono. O le mea lea e tulituli atu, o a tatou ietoga, o maumaga ma mea faapena lea na aumai i le Tulafono Autu. O lea la e faafesili atu aua o le taavale ia e le o se mea fou, a o le mea lava e tapa i ai faletupe pe a manaomia e tagata ni nonogatupe, a o le mea lea e fai atu ai, o mea foi ia pe a manaomia vave mo faalavelave. E le mafai ona avatua le taavale e faamau ai mea na. Sa manatu o le Tulafono Autu e avatu i ai le ietoga ona tatala mai lea o sina \$300 pe faasino i ai lo ta maumaga. O le mea lena o lea ou te tulituli atu po o ua i ai la ni mea faapena ua faatino i le taimi lenei? Aua o le taimi nei, a o atu tagata i faletupe e le talia mea nei.

FOFOGA FETALAI: O lea ua maua atu lou finagalo le Taitai o le Itu Agai.

Tofa Hon Fonotoe Nuafesili Pierre Laufo: O lea na ou avatua le taavale e fai ma faataitaiga. Ua na o se faataitaiga. O lea na ou avatu manino lava ua na o se faataitaiga lea na mafua ai ona ou avatua le taavale afi, a o isi uma vaega, o mea na e mafai lava ona fai i isi tulaga i le va o le faletupe ma le tagata lava ia, ae ua faatulafonoina. O le mea taua lena o le faatulafonoina o le faiga o mea faapenei. Ia, o le fesoasoani tele lena.

FOFOGA FETALAI: Se i tulai mai lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, e le fou nei mea a o mea lava ua leva.

O le mea lea e saunoa atu ai le Sui Palemia, o mea na o la e moomia e faletupe e faigofie ai ia i latou ona faatino vave se faaiuga.

O maumaga ma mea faapena ua leva lava ona faaaoga foi e le Faletupe o le Atinae, a o le mea taua la lea e pei e fou i tagata, o le tuu i ai ma taavale, tuu ane i ai ma au televise, tuu i ai ma moega, ae i ai isi tagata e o atu lava tuu i ai ma o latou taitoalua. E le afaina la pe afai e laitiiti le loomatua aua e o atu lava latou ma a latou value po o le tau o le loomatua, a o mea la na e le moomia e se faletupe, ae aoga foi le laga mai o lea ua tau atu ai le mea e fai e le tagata. O lea o le a tauau ina avatu ai ma nai loomatutua, ae e le moomia e faletupe na mea. E i ai foi ma isi mea e tai pei o fanua ma faamaoniga a o latou faipule. E tasi lena mea aua a omai nei e sue mai Palu, e fiu e sue Palu o la e fesolasolaai solo.

E pei o le mea lena o lea e moomia ai nai mea ia e tua i ai le tagata e sau e le maua mai le faipule o le latou itumalo, aua o faipule foi o itumalo ua fiu ai faletupe. E leai lava se faipule o toe talia, a o lea la ua ou tau atua ia i latou o lo o fia faaaoga faipule ona o le mea lena e uma loa lava le palota, e toe sue atu e faletupe faipule, ua o i fafo nonofo ai. Ma le isi mea e toe fiu e sue atu le faipule, ua sili atu le mativa nai lo le tagata lea e fia nono se tupe. O lona uiga la ua matua fuamoa aato mea nei o faipule, ua le toe talitonuina. A alu atu la se tagata e tusi ai i lalo ma le faipule, ae tusi ai i lalo e \$100,000, e matua fuamoa aato i le value a le faletupe le faipule.

Lau Afioga i le Fofoga Fetalai, o le aoga lena o mea ia tatou te talanoa ai i le faamauina o aseta, e le taulia le toalua, e le taulia foi le faipule. Lau Afioga i le Fofoga Fetalai, o le toe faamalamalamaga lena. E le o ni aseta na e faalagolago i ai faletupe ona ua na o ni aseta na e gaugau ai faletupe.

FOFOGA FETALAI: Ia, se i tulai mai le sui usufono mo Faleata Sisifo.

Tofa LEALAILEPULE RIMONI AIAFI (Faleata Sisifo): Lau Afioga i le Fofoga Fetalai, e le oo sau faamatalaga i le saunoaga a le Afioga i le Palemia i le toalua aua o le toalua, e le o se aseta, she is the love of your life.

O lau fesili lau Afioga i le Sui Palemia, o le Tulafono Tau Faaofi lenei lea na tele foi i ai a tatou faamatalaga, e le i atoa se tausaga a o lea ua aumai le Teuteuga. E le iloa foi pe ua faatino le Tulafono, a o lea ua Teuteu aua o le mea lea na aumai ai muamua....faafetai ua aumai le Teuteuga, ae ua matua le mautinoa e lou sui usufono pe faapefea ona aumai le Tulafono Autu po o le Principal Act ma se vaega faapea na ona resitala o se aitalafu ae le resitalaina i lona lava igoa. O le mea la lena faafetai o lea ua aumai le Teuteuga, aua o le matua – e le logic, e le make sense le mea lea na aumai muamua, o lou alu atu e fai sau aitalafu ae.... Ae o lea ua aliali mai e matua sese lava le mea lea...

FOFOGA FETALAI: O lea ua maua lou finagalo. O lea ua maua lou finagalo, se i tali atu le Minisita.

Tofa Hon Fonotoe Nuafesili Pierre Laufofo: Lau Afioga i le Fofoga Fetalai, o le mea sa mafua ai le teuteuga lenei, o luga o le system lea sa ou taua o le resitala electronic system. A o le taimi lea e ave uma ai faamatalaga e tusa ai ma le aitalafu po o le taavale lea e ave e faamau ai le aitalafu, o lea e alu atu uma ai lava ma igoa, a o luga la o le electronic system lea sa pau mai ai le suafa, lea e sau ai ma numera, a o lea la o le a faaopopo i ai ia faatulafonoina ina ia faatauaina ma le suafa ia faapipii i luga o le computer. O se mea lena o lea sa pau mai le system.

Tofa LEALAILEPULE RIMONI AIAFI: Lau Afioga, ana faapea e onosai le Afioga i le Sui Palemia se i uma atu lau faamatalaga ona tali mai lea ae le afaina, aua o lea ua oo i le mea lea na ou tau fai atu ai. O le mea lava ia mai le amataga ma so o se aitalafu ma so o se mea e te alu e faamau, e tataua lava ona alu i le igoa, e le alu i ni fuainumera faapea. Ae faafetai o lena ua faasao, e le i faamamaluina le Tulafono Tau Faaofi. Ma lou faaaloalo lava.

Tulai mai le sui usufono mo Gagaemauga Nu.2.

Tofa LEVAOPOLO TALATONU (Gagaemauga Nu.2): Lau Afioga i le Fofoga Fetalai, o le tasi lenei o Tulafono Tau Faaofi e oo mai lava i le taimi lenei ou te le o malamalama ai, ua leva ona taoto i i, ua ou fiu foi e faitau. Ae sa i ai la le agaga, e aumai se faamalamalamaga manino a le Afioga i le Sui Palemia po o le Afioga i le Minisita, i le mataupu lea. Ua lagona lava lou faanoanoa i le aso lenei i lou faalogologo atu o faataitaiga mea ia e aumai. Sa i ai lava lou manatu e aumai mea moni i totonu i i ina ia malamalama lelei le Maota aemaise o le faafogafoga a le atunuu i lea foi faiga o le atinae mo le lelei o le atunuu, a o lea ua ou faalogologo atu nei, o le faataitaiga le mea lea e fai mai totonu o le Maota. O se tulaga lena lau Afioga.

FOFOGA FETALAI: Malo. O lea ua maua le sui usufono mamalu. Se i tulai atu le Sui Palemia.

Tofa Hon Fonotoe Nuafesili Pierre Lauofo: O le mea e fia faasao lau Afioga i le Fofoga Fetalai, e le o ni faataitaiga mea ia e aumai, o lea na avatu taavale afi e fai ma faataitaiga e faamalamalama ai le Tulafono Tau Faaofi. O lea la e sao ai lava le sui usufono, e matua le malamalama lava i le Tulafono Tau Faaofi. O le mea la lea, o lau fautuaga, se i toe foi i tua e toe faitau fautuaga lea sa fai i le Tulafono Autu atonu e maua ai i ina se silafia ma se malamalamaaga o lau Afioga.

FOFOGA FETALAI: Malo. O lo o manino le igoa o le tatou Tulafono Tau Faaofi, o le Tulafono Tau Faaofi o Teuteuga o le Tulafono o Faamalumaluga e Faamau ai Meatotino. O lona uiga o meatotino, o taavale afi, o ietoga, o aufai, o moega, o TV ma mea uma na sa taumafai le Minisita e faamalamalama atu. Ae sa faaaoga e le Sui Palemia le taavale, ona na pau lena o se mea e iloa o la e i ai le credibility i totonu o faletupe e fai ai guarantees o loan.

E i ai se isi mea lau Afioga i le Taitai o le Itu Agai?

Afioga Hon Palusalue Faapo II: Ioe, leaga o lea e tau fai atu lau tala faataitai e pei o le tala a le Sui Palemia.

FOFOGA FETALAI: Ia se i fai lau tala faataitai?

Afioga Hon Palusalue Faapo II: Na sau si toaina o lou itumalo ma lana TV i le pasi, afe atu loa i lou fale, fai mai, “o lea ou te sau e ave lau TV lea e faamau i lau aitalafu \$200.” Oooohh leaga o lea e faalogologo mai i le Tulafono Autu lea. O le matua fiafia lava o le atunuu o le a maua le fesoasoani. Ou fai atu loa, “Ia alu loa la ma lau TV e ave i le ANZ.” Ona amo lava lea o le TV a si toaina, ae alu atu i le ANZ, e leai se mea e talia. Na toe tu atu ma le TV ia te au i o, ou tigaina ai e fai le pasese.

O le mea la lena o lea ou te fai atu ai i le Tulafono Tau Faaofi lenei, ia aumai ni faataitaiga, i omai itumalo ma moega ma mea faapena, ae o atu e le talia e banks.

FOFOGA FETALAI: O lea ua maua atu le finagalo.

Susuga Hon Tuilaepa Fatialofa Lupesoliai Aiono Neiote Sailele Malielegaoui: Lau Afioga i le Fofoga Fetalai o se mea e fia faamalamalama, e le faapena ona faia le mea, o lou fealuai ma feamoai solo le TV. E atagia a i ina le vaivai tele o toeaia o le itumalo. E tataua ona e fesoasoani. O le mea lea e i i, o le resitala. O aso nei, o le mea lena o lea e fai e le au gaioi fale. E te i lava lea, ‘o lea e i ai lau TV lea e fia faatau.’ E le mafai ona seetia gofie ai le bank po o se isi lava i mea faapena, aua e tu loa le tagata ma le TV e amo, e tasi lava le mea, ua gaioi.

FOFOGA FETALAI: Matua sese tele lau faataitaiga na aumai nei. Tulai mai se tasi o sui usufono mo Safata, Afioga Hon Manualesagalala Enokati Posala.

Afioga Hon Manualesagalala Enokati Posala (Minisita mo Galuega, Felauaiga ma Atinae Eseese): Lau Afioga i le Fofoga Fetalai, o se mea e fia faasao. Ou te iloa e le o i ai se toeaina o le itumalo lenei na agai mai ma se TV, leaga o le matou itumalo a mativa, a le alu i le sami, e alu i le faatoaga. E sese la lou uso a sui usufono lea ua afaina ai lou itumalo. Ma le agaga faaloalo.

Afioga Hon Palusalue Faapo II: Lau Afioga i le Fofoga Fetalai, ou te le tali i ia mea, aua leaga o le reality lea o le mea lea e i ai, e tupu mai loa se faalavelave tapa loa i le faletupe mo se fesoasoani. E pei la o le agaga lena o le Tulafono Tau Faaofi lau Afioga i le Sui Palemia sa ou manatu o le a matua maua ai le toomaga e nai o tatou tagata. Ae peitai, o lea ua e fai mai le faataitaiga i le taavale, ae te le fai maia le faataitaiga i le moega, o le TV, o le pusaaisa, o le nofoa. O mea faapena.

FOFOGA FETALAI: O lea ua maua Palusalue, o lea o le a tau atu le....

Tofa Hon Fonotoe Nuafesili Pierre Laufo: Lau Afioga i le Fofoga Fetalai o se mea e fia faamalamalama. O le itu lea, na o se fonofono faapipii atu i le saunoaga a le Afioga i le Palemia, e leitioa a le talia e le faletupe, se o lea e le i oo i le taimi e faamalosia ai le Tulafono Tau Faaofi a o lea ua feamoai TV i le faletupe. Se i silasila la i ai, ua atagia ai le le malamalama o le Taitai o le Itu Agai i le mea lea e i ai nei le tatou Tulafono Tau Faaofi.

E pei o le tulaga lena lau Afioga, o lea se i maea nai teuteuga ia ona faalauiloa foi lea i le tulaga masani o le poloaiga i le taimi tonu e amata ai ona faamamalu le tatou Tulafono Tau Faaofi. E pei o le tulaga lea.

Afioga Hon Palusalue Faapo II: Lau Afioga i le Fofoga Fetalai, o le mea e fia faasao. Ua uma ona pasia le Tulafono Autu, ua uma foi ona saina ma faamamalu Le Ao o Le Malo. E tusa la o lea ua faaoga le Tulafono Tau Faaofi, se i vagana ai la le teuteuga lea. O le mea lea e fia faasao i le saunoaga a le Sui Palemia.

FOFOGA FETALAI: O lea ua maua lou finagalo Palusalue. O le faamalieina o lou finagalo, e sese le faletupe lea na alu i ai lau toeaina lena. O lea o le a ou tau atua le faletupe e agai i ai, agai i le Moatoga po o le Treasure Garden lea e talia ai TV.

Tofa Lealailepule Rimoni Aiafi: Lau Afioga o lea e fia fesoasoani i le Taitai o le Itu Agai, o le Tulafono Tau Faaofi, o lea ua aumai le Teuteuga, ae le i faamamaluina. O le sao lena.

Na faamaonia le lafo ma faitauina le Tulafono Tau Faaofi o Teuteuga o le Tulafono o Faamalumaluga e Faamau ai Meatotino tau le Tagata lava Ia 2014 i lona faitauga faalua.

FOFOGA FETALAI: E tusa ai ma Tulafono Tumau o le a tuuina atu le Tulafono Tau Faaofi i le Komiti o Oloa Gaosia Tulaga Muamua, Mataupu Tau Pisinisi, Alamanuia ma Leipa mo le iloiloaina ma toe lipoti mai i le Fonofono Aoa o se Fonotaga o lumanai.

**TULAFONO TAU FAAOFI O TEUTEUGA O LE TULAFONO O ASO
MALOLO MO TAGATA UMA 2014 – faitauga faalua**

FOFOGA FETALAI: Mo le silafia e le Palemene o le Tulafono Tau Faaofi leni sa faia lona faitauga muamua i le aso Fono 20/6/2014.

Tulai mai lau Afioga i le Minisita mo Pisinisi, Alamanuia ma Leipa, lau Afioga i le Sui Palemia.

Tofa Hon FONOTOE NUAFESILI PIERRE LAUOFO: Faafetai i lau Afioga i le Fofoga Fetalai.

Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Aso Malolo mo Tagata Uma 2014 i lona faitauga faalua ma ou te fia tautala faamalamalama i ai.*

Faaluaina e le Minisita mo Galuega Tau Alamanuia ma Atinae a le Malo ma le Minisita mo Tina ma Tamaitai, Atinae o Nuu ma Afioga ma Agafesootai.

FOFOGA FETALAI: Tulai mai lau Afioga i le Sui Palemia.

Tofa Hon FONOTOE NUAFESILI PIERRE LAUOFO: Lau Afioga i le Fofoga Fetalai, o le Tulafono Tau Faaofi leni e Teuteu ai Tulafono o Aso Malolo mo Tagata Uma 2008.

E tolu lava nai mataupu taua o leni Tulafono Tau Faaofi Toe Teuteu. O le vaega muamua, o le faamatalaina lea o le uiga o le upu faleoloa. O faleoloa ina ia fesootai ai ma se fale po o se nofoaga ua faatonutonuina faaetulafono i lalo o le Tulafono o Laisene o Pisinisi 1998. O lona uiga, o le faauigaina o le upu faleoloa, ia ogatusa ma lena foi Tulafono o Laisene o Pisinisi 1998.

O le vaega lua e fia teuteuina lau Afioga i le Fofoga Fetalai, o le i ai lea o se malosiaga faaopopo i Le Ao o le Malo e faaalina manino ai so o se aso a o faagasolo se tulaga o faalavelave tutupu faafuasei e avea o se aso malolo o faalavelave tutupu faafuasei. O lona uiga o le taimi foi lea e agi ai se afa pe tutupu ai ni faalavelave faalenatura. O tulaga faapena, ona i ai lea o le malosiaga lea e mafai ai ona faasilasila ai ma poloaia ai ia avea lena aso po o ni aso o ni aso malolo faatulafonoina.

O le vaega lona tolu, o le malosiaga lea i le Minisita e faaalina manino ai se aso e manaomia e se tagata e ona galuega e avea ma aso malolo o tagata e ona galuega. O lona uiga po o se aso malolo lava faapitoa mo se falefaigaluega po o se kamupani, ona o ni tulaga masani lava po o ni tulaga taualoa a le latou foi kamupani po o se aso faapitoa, ona manaomia lea o se aso malolo, ona aumai ai lea o le talosaga agai i le Matagaluega ona faapena foi lea ona silasila i ai ma faatulagaina ai le tulaga o le aso e pei ona talosagaina.

E pei o nai vaega laiti ia e tolu lau Afioga i le Fofoga Fetalai ua faatulai mai ai leni Teuteuga. Ma le faaloalo tele.

FOFOGA FETALAI: Tulai mai le sui usufono mamalu mo Faleata Sasae.

Tofa AVEAU TUALA LEPALE NIKO PALAMO (Faleata Sasae): Faafetai i lau Afioga i le Fofoga Fetalai, faafetai foi i le Afioga i le Sui

Palemia mo le Tulafono Tau Faaofi. Faafetai foi i le Afioga i le Minisita mo faaaloaloga pei ona alo atu i ai le itumalo i lenei taeao.

Ae ua ou tulai atu ou te fia faafesili atu lava i lau Afioga i le Minisita i le Tulafono Tau Faaofi lenei, aemaise lava i le vaega fou lea ua faaopoopo 7(a) Aso malolo a tagata e ona galuega. O lau vaai atu i ai i le Tulafono Tau Faaofi lenei, tusa o lea o le a pule le Malo i le tagata e ona lana pisinisi po o lana kamupani lea e fai, i aso e manao ai e fai sana aso malolo. O se faataitaiga, afai, i lau tilotilo i ai i le Tulafono Tau Faaofi, afai o au e ona se kamupani, a o lea o le a ou manao e fai se aso malolo o lou aso fanau ona o au e pule i le kamupani, pe ou te manao foi e fai se aso malolo e faailoga ai se 10 tausaga o lau kamupani. O lea o le a ou tusi i le Minisita e talosaga ai lea aso malolo. Aisea? Aisea le mea o le a ou tusi ai fua i le Minisita, a o le mea e pule lava au ia o au e ona le galuega? Faamalolo au tagata faigaluega, ou mulimuli i le Tulafono a le Leipa i totogi o tagata pe a oo ina malolo i le aso malolo. A o lea ua fai mai le Tulafono Tau Faaofi, e mafai e le Minisita ona teena pe a ou tusi atu i ai ma avatu i ai lau talosaga. Aisea le mea o le a fai ai fua lenei Tulafono Tau Faaofi le fetau, lenei suiga le fetau i totonu o le Tulafono Tau Faaofi? E i ai se mafuaaga tatau ua ala ai ona fai? Aua a e tagai i le pito i lalo o le Tulafono Tau Faaofi, o lenei fuaiupu e le faaogaina e le Malo. E le afaina ai la Matagaluega a le Malo i le vaega lea ae na o kamupani ma tagata taitoatasi.

O le ala la o lau fesili, o le a tonu lava le mafuaaga ua ala ai ona faatino mai lenei Tulafono Tau Faaofi, aumai ai le mea fou lea e aiaia ai le pule saoloto a le e ona le galuega i le aso e malolo ai ma le aso e fai ai ana galuega?

Ma le faaaloalo lava.

FOFOGA FETALAI: Malie lau Afioga i le Sui Palemia o le a faauma atu lauga a sui usufono ona tulai mai lea o lau Afioga e tali.

Tulai mai le sui usufono mo Faleata Sisifo.

Tofa LEALAILEPULE RIMONI AIAFI: Faafetai i lau Afioga i le Fofoga Fetalai. Faafetai i lau Afioga i le Sui Palemia mo le Tulafono Tau Faaofi, ou te iloa e lagolagoina foi le Tulafono Tau Faaofi, a o nai vaega lava ia. O le vaega muamua i le faamaninoina o le upu faleoloa. Ia manatua foi aso ia aso malolo, e i ai lava faleoloa foi nei e tatau ona tatala i aso ia i falaoa ma daily needs a tagata, lea e tatala ai lava faleoloa laiti i aso malolo, a o lea pei ua taaofai uma mai i le Tulafono Tau Faaofi, e tapunia uma i aso ia. Po o le a le faasaoga o lea vaega?

O lona lua, o le totogi i mea ia o aso malolo faapitoa ia po o aso ua finagalo Le Ao o le Malo ma le Malo e avea ma aso malolo, o lea e fautua mai le Tulafono Tau Faaofi, i se special rate, fua faatatau. I lou talitonuga, e tatau ona manino po o le a le ituaiga rate, aua e avea ma mea e feteenai ai foi tagata faigaluega, ma le e ona le galuega. O lea e faapea mai, e i le va o le normal rate ma le double rate. O le a le mea e le tuusao loa i ai le rate e talafeagai ma le tou talitonuga e tusa ai ma le Tulafono o Leipa, o lena e i ai le rate faapitoa e alu ai i le taimi lea e tatau ona manino ai le vaega lea ina ia aua nei i ai se feteenaiga i nai tagata faigaluega ma le e ona le galuega.

Ma le vaega mulimuli lau Afioga, e lagolagoina le finagalo o le sui usufono mo Faleata Sasae, o le tatou Tulafono, pei o lea o le a tau agai i tua i private sector i latou lava pisinisi e ona a latou pisinisi ma a latou galuega, aua pei o

latou ia e i ai le latou aiatatau i le taimi e fia fai ai se aso malolo a latou lava ia, ae pei o lea o le a tamau i lalo o le tulafono, ou te fesiligia ai lea vaega, po o le a le mafuaaga? Aua e pule lava Sitafune ia i le la o lona vaa, i le tagata o lo o fai lana pisinisi, ia se aso foi e fia malolo ai lava latou i le latou faitalia. Ma le faaaloalo lava.

FOFOGA FETALAI: Tulai mai lau Afioga i le Sui Palemia, e pau ia o finagalo na faaalua e sui usufono mamalu.

Tofa Hon FONOTOE NUAFESILI PIERRE LAUOFO: O lo o manino lava le vaega lea o le Tulafono pei ona saunoa i ai sui usufono mamalu, e mafai e le kamupani ona talosagaina le Malo po o se faatagaga e ala lea i le Matagaluega ma le Minisita e tuuina atu pe faataua se aso foi lea ma avea se aso o se aso malolo po o le public holiday mo le kamupani lava ia. E i ai mafuaaga o mea nei, e le i faatulai fua foi lenei vaega o le Tulafono, e i ai foi nisi o kamupani ia e mafai ona...sa fai ia isi tulaga faapena o le faamalolo o le aufaigaluega faapea o se aso faapitoa, ia ae e le maua faamanuiaga, e le maua totogi. O mea la ia o lea e tatau ona aumai e faamamalu i le Tulafono, afai loa e oo i se taimi ua finagalo ai le pule o le kamupani ma le fale faigaluega e faa-aso malolo le aso lena a le aufaigaluega, e sao e le faapea e pule atu le Malo i o latou aso, a faapea o se aso faapitoa lava ia o le kamupani ae faamalolo lana aufaigaluega, e tatau foi la ona amanaia faaletulafono tulaga o totogi ma faamanuiaga e maua e tagata faigaluega, e tatau foi ona maua, pei foi la o le tulaga o le totogiina o latou NPF o tulaga faapena, e tele isi mau mea e tatau ona faamamalu aua e tatau lava ona aloaia i le Tulafono i lalo o mea o aso malolo faapenei. O tulaga na e tatau ona.....o le faiga foi nei o lea lava e tau sosolo atu foi ma le mea o lo o aumai i fafo, pei foi ona saunoa se tasi o sui usufono i tulaga o Faalapotopotoga o le Lalolagi, o le International Labour Organisation. O faleoloa e le o tapunia ia tulaga o faleoloa pei o le mea lea sa laga, o lea lava e faatulafonoina le tatalaina o faleoloa i aso ia po o taimi o malologa i faleoloa o lo o manaomia le tulaga pei o bakeries, o fale falaoa e i ai ma tulaga faapena, e le o aafia foi faleoloa na i le Teuteuga lenei.

Ia pei o vaega uma na o lo o silasila foi i ai le Malo, o rates, o lo o manino lava le tulaga o rates, e fuafua foi faapena, o la e faatulafonoina le tulaga o rates, ae manatuaina foi, o taimi uma o lea e mataitu e le Matagaluega o Leipa ia galuega uma nei ma kamupani uma nei, o la foi e avanoa le tatou Matagaluega, a faapea e i ai ni faaletonu, e avanoa e avatu ai faasea a le aufaigaluega. Ia pei foi la o le tele o faasea ma manatu ma finagalo o le aufaigaluega o lo o i tua i le private sector, lea e mafua ai ona fau mai Tulafono nei ma Teuteuga nei, aua foi le malupuipua o latou tulaga o latou galuega, ma o latou totogi e faapena foi ia tupe ma faamanuiaga e tipi mai i o latou totogi i saofaga i le NPF, ma isi uma mea faapena, o le ACC ia ma tulaga uma faapena, a le faatulafonoina, o lona uiga e le entitle foi latou i ai.

E pei o vaega ia o lea e mafua ai le tatou Tulafono Tau Faaofi, ma le faaaloalo lava i lau Afioga i le Fofoga Fetalai.

FOFOGA FETALAI: Malo faafetai. E manatu ua manino ma malamalama le saunoaga a le Afioga i le Sui Palemia. Ia se i toe tulai mai le sui usufono mo Faleata Sasae.

Tofa AVEAU TUALA LEPALE NIKO PALAMO: Lau Afioga i le Fofoga Fetalai, faafetai mo le faamalamalama a le Afioga i le Sui Palemia. Afai o le mafuaaga lea ua saunoa i ai le Afioga i le Sui Palemia, e i ai la lagona e le tatau ona faaupu faapea le vaega lea o le Tulafono Tau Faaofi, afai o lea e mananao ona o le totogi, e tatau ona alu i lalo o le vaega lea e aiaia Tulafono a le Leipa. A o le mea lea e sau i i o lea e mafua ai lau fesili, aisea le mea o le a talosaga ai fua au e ona le tagata faigaluega i le Malo e fai ai le aso malolo lea, a o lea e i ai le Tulafono a le Leipa e mafai ai ona faatino ai le mea lea e saunoa i ai le Afioga i le Sui Palemia?

FOFOGA FETALAI: O lea ua manino le saunoaga a le sui usufono.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, masalo e i ai lava le mea e misi atonu o i ina foi lea e ala ai ona pei e vaai foi lele i le Tulafono ua fai sina pito tasi. Ae manatua foi o lalo lava o aiaiga i mea nei o pisinisi, e le faapea na ona talosaga mai loa avatu ia lou laisene, ona e pule lava lea o oe i le mea e fai. O le Malo, e lautele lava le mea e vaai i ai, e le gata i le vaai i le tulaga au i luma o le e ana le pisinisi, ae vaai i le tulaga lautele o le tagata o lea e faigaluega po o puipuia lelei, ae toe vaai i tagata lautele ia e tautuaina e le pisinisi. Mo sina faataitaiga, o pasi, o le tele ia o le gaosa i mea nei o pasi, e tatalo tatalo mai le fai pasi, se i sau le.....e moomia lava le pasi i i e lau atu ai ia le pitonuu lea. Na ona maua lava o lau laisene, pule loa le fai pasi i le taimi e...a fia malolo lava ia malolo. A faapefea tagata ia na mafua ai ona avatu ai le lasene o le pasi, aemaise o tagata e usu mai i taeao uma mai i galuega, ma le fanau e aumai? O lona uiga, e le na o le tagata e ana le pisinisi e tatalo mai loa ona avatu lea i ai o le faamanuiaga a le Malo, e vaai le Malo i le lelei ma le puipuia o tagata faigaluega, ia puipuia ia ona totogi ma ana aiatatau, toe vaai i tagata ia na mafua ai ona faatu le pisinisi. E le faapea e te pule loa oe e tapuni lau pisinisi, tapuni loa. A faapefea tagata na ala ai ona e toai mai i le amataga ma talosaga mai e avatu o le a e tautuaina latou i le 24 itula o le aso? E fai lava sina lautele o le mea e tilotilo i ai ia le tatou Malo. O le ala foi lena na ala ai ona fai nei Tulafono o Leipa. I le amataga mai lava ina ua amata ona fai pisinisi mai Peretania, o, o le faiga o tagata pei ni manu ia le faiga o tagata faigaluega e le aufaipisinisi. O le mea la lena e ala ai ona malosia le tulai mai o le Malo, e le gata ina puipuia le pitolaau a le faipisinisi, ae tatau foi ona puipuia le pitolaau a le aufaigaluega, puipui ma le pitolaau a tagata ia e tautuaina e le pisinisi. E le faapea o le a e manao loa e fai lou aso malolo aso malolo, ae o le a faapefea i latou ia, lea na avatu ai le laisene ia te oe e te tautuaina i le 24 itula o le aso?

Lau Afioga i le Fofoga Fetalai, ia o le tulaga lena, e fai sina lautele o le mea e vaai i ai le Malo.

FOFOGA FETALAI: Malo faafetai. Oi ia, saunoa le sui usufono mamalu o lea ua.....

Afioga MAUALAIVAO PAT AH HIM (Palota Taitoatasi): Lau Afioga i le Fofoga Fetalai ma le faaaloalo, faafetai mo le avanoa.

Ou te talitonu o lena Tulafono Tau Faaofi e i ai foi lona taua, ona o lea e taua mea nei o pisinisi ma faleoloa, ae ou te talitonu e pei ona saunoa le

Afioga i le Palemia e i ai foi lona taua ona o nisi o auauunaga e tua i ai le atunuu, e le pei na o faleoloa e mafai lava ona tapuni pe a oo i le taimi manava, ae a silasila foi i ni vaega lea e i ai i latou ua faatauina le card foi lea aua ia le auauunaga lea i le eletise, ia tasi foi lona mea e taua pei ona saunoa le Afioga i le Palemia, aemaise taavale feoi e tua i ai le atunuu, ae o mea o faleoloa, e le faigata, e faigofie lava, e le o se mea e vagana lava ia faleoloa o lo o i ai le auauunaga taua lea o le taumafa. I lou lava lagona e lagolagoina le Tulafono Tau Faaofi, e leai foi se agaga ne i te i ua faapea o le aufaipisinisi e le lelei le vaaiga o le aufaigaluega. A o le mea lea e taua, o so o se faipisinisi lava e i ai le agaga lea o le faamalolo o le aufaigaluega po o se aso malolo ae le totogia NPF ma mea e talafeagai mo le aufaigaluega, e solitulafono, ioe, e tatau lava ona mulimulitaia le Tulafono. Ou te tulai atu ma le faaaloalo, ona o lo o faafogafoga mai le aufaipisinisi, ae ua manaia le faamalamalama lea a le Afioga i le Palemia ua maua ai foi le lagona, e sao, e moni o lo o i ai auauunaga e tai 24 itula e tatau lava ona faaauau, ia po o le faaauau foi i le tulaga i taimi e talafeagai ona oo i ai. O le manatu lea o le sui usufono, ma le faaaloalo lava, faafetai.

FOFOGA FETALAI: Malo faafetai.

Afioga Tufuga Gafaleata Faitua (Vaisigano Nu. 1): Lau Afioga i le Fofoga Fetalai, o le mea e fia malamalama faamolemole lau Afioga.

FOFOGA FETALAI: Ia o lea ua tali le Minisita e ona le Tulafono Tau Faaofi a o lea ua...tulai mai le sui usufono mamalu.

Afioga Tufuga Gafaleata Faitua: O le fesili lau Afioga o le fia fesili i le fesili lea a Faleata. Pe a talosaga atu le tagata faipisinisi i se aso malolo ae talia e le Minisita, pe o le a faapefea la i aso malolo ia pe lavea i se rate foi lea e double i aso malolo e ese mai i aso o le Malo? O le fia malamalama la lau Afioga, ona o le aufaigaluega, pe a malolo i aso ia, e mafai la e le tagata faipisinisi ona totogi ia tagata faigaluega o le a malolo i aso e ese mai i aso a le Malo? Faafetai.

FOFOGA FETALAI: Ia se i tulai atu pea le Minisita.

Tofa Hon Fonotoe Nuafesili Pierre Laufo: Lau Afioga i le Fofoga Fetalai, o le talosaga foi lea ia avea se aso faapitoa o kamupani ma public holidays, a, is a public holiday? Lona uiga la, o le rate lava lea e apply i public holiday, o le rate lona.

FOFOGA FETALAI: Malo. E manatu ua manino ma malamalama le faamalamalama a le Afioga i le Minisita.

Na faamaonia le lafo ma faitauina le Tulafono Tau Faaofi o Teuteuga o le Tulafono o Aso Malolo mo Tagata Uma 2014 i lona faitauga faalua.

FOFOGA FETALAI: E tusa ai ma le Tulafono Tumau o le a tuuina le Tulafono Tau Faaofi o Teuteuga o le Tulafono o Aso Malolo mo Tagata Uma 2014 i le Komiti o Oloa Gaosia Tulaga Muamua, Mataupu tau Pisinisi,

Alamanuia ma Leipa mo le iloiloina ma toe lipoti mai i le Fono Aoa o i se Fonotaga i le lumanai.

TULAFONO TAU FAAOFI O LE OFISA O TIUTE 2014 – faitauga faalua

FOFOGA FETALAI: Talu ai ua ou taulimaina le Tusi Faamaonia o le Tulaga Faanatinati ua maea foi ona sainia e Lana Afioga Mamalu, O Le Ao o le Malo e uiga i lenei Tulafono Tau Faaofi, o lea o le a sagai atu loa le Palemene mo le faitauga faalua.

Tulai mai lau Afioga i le Minisita mo Tupe Maua.

Tofa Hon TUILOMA LAMEKO: Lau Afioga i le Fofoga Fetalai faapea ia sui usufono mamalu o le Maota, ua ou tulai atu e faatu le lafo, *Ina ia faitauina nei le Tulafono Tau Faaofi o le Ofisa o Tiute 2014 i lona faitauga faalua, ma ou te fia talanoa i ai.*

Faaluaina e le Sui Palemia, Pisinisi, Alamanuia ma Leipa ma le Minisita mo Galuega Tau Alamanuia ma Atinae a le Malo.

FOFOGA FETALAI: Tulai mai lau Afioga e saunoa faamalamalama.

Tofa Hon TUILOMA LAMEKO: Lau Afioga i le Fofoga Fetalai, o le isi lenei Tulafono Tau Faaofi lau Afioga o lo o aafia ai tele lo tatou atunuu, aemaise lava le tulaga o feafaatauaiga i le Ofisa o Tiute. Ma o le tulaga ua i ai ua sili nei i le 30 tausaga talu ona i ai le Tulafono o lo o faaaogaina nei, o le Tulafono Tau Faaofi o Tiute 1977. Ma o le Tulafono Tau Faaofi la lenei 2014 mea tau Tiute, o le agaga o i ai, e tusa ua taumafai ina ia soloia atoa ia le Tulafono Tau Faaofi o Tiute lea o le 1977, ae suia i le Tulafono Tau Faaofi fou lea ua silasila i ai lau Afioga i le Fofoga Fetalai. O le tulaga faigata ua i ai nei pei ona silafia, o le suiga o le gagana e faaaogaina i le taimi nei, aemaise o le poto ma le atamai faatekonolosi i lenei vaitaimi, sa le i i ai i le taimi na amata ai ona faafuafua ai le Tulafono o mea tau Tiute i le 1977. O lea la ua manatu ai, ina ia talafeagai ma fuafuaga aemaise foi ma tiute o isi o faalapotopotoga o le lalolagi o lo o aafia i le feafaatauaiga, o lea ua manatu ai, ina ia suia le Tulafono. O le Tulafono Tau Faaofi la lenei lau Afioga i le Fofoga Fetalai ma sui usufono mamalu o le Maota, ua saunia e i ai foi tagata faapitoa na omai ina ia suia ai le tulaga o le Tulafono ina ia fetui ma taimi e le gata, aemaise lava le gagana faaonaponei lea ua tele ina faaaogaina e i ai le tekonolosi.

O le mea la lea lau Afioga i le Fofoga Fetalai, o le tulaga taua lena o le Tulafono Tau Faaofi lenei, o a ni mea o lo o faaletonu i le Tulafono Autu lea o le 1977, lea la ua suia nei i le Tulafono Tau Faaofi o le Ofisa o le Tiute 2014. O le isi foi vaega lau Afioga, e talafeagai le toe suiga ua i ai nei i le vaai mai a Malo aemaise le fetuunaiga ma atunuu tetele o le lalolagi, o le isi lena vaega taua ua sui le Tulafono ma le faamoemoe ua suia ai le tulaga ina ia mafai ai ona atagia i totonu o le Tulafono ma faiga faavae ma gaoioiga a le Ofisa o le Tiute le tulaga o lo o fai e atunuu tetele aemaise Faalapotopotoga

tetele nei e pei o le WTO, o lo o i ai le tulaga e ao ai ona siitia ma ao ai ona suia le Tulafono Tau Faaofi.

Lau Afioga i le Fofoga Fetalai o se faamalamalama lena e uiga i le Tulafono Tau Faaofi ua i luma nei o lau Afioga ma le Fono mamalu a le Palemene.

FOFOGA FETALAI: Faamalo atu saunoa faamalamalama i lau Afioga i le Minisita mo Tupe Maua.

O le avanoa lenei mo tatou felafolafoaiga. Tulai mai le sui usufono mo Faasaleleaga Nu 2.

Susuga PAPALII LIO FAAVAIIVAIOMANU TAEU MASIPAU (Faasaleleaga Nu.2): Faafetai tele i lau Afioga i le Fofoga Fetalai mo le avanoa. E momoli foi le agaga faafetai i le Afioga i le Minisita, le Tama Matua foi o le Kapeneta mo lenei Tulafono Tau Faaofi taua, ua fai foi si leva o le Tulafono e pei ona saunoa, ae o lea ua pei ua tele le suiga lea ua i ai nei i le Tulafono Tau Faaofi. Faafetai i lau Afioga i le Minisita faapea foi le Ofisa Sili o Pulega ma le Matagaluega, o lea ua taatia mai i i reforms ma tuutuuga aua le agai i luma o le auunaga, aemaise foi o le faatauaina o fautuaga a le Komiti na avatu, ou te talitonu o lea ua tele ai le suiga o lenei Tulafono. Malo faafetai i lau Afioga i le Minisita.

E i ai nai vaega ia e fia avatu foi se faafesili ma se fia malamalama foi, e faamalulu atu i lau Afioga i le Minisita, e i ai le vaega lea o le Tulafono lea o le faimalaga ese atu o tagata o le tatou atunuu. O le Tulafono tuai e pei e le i ai se mea faapea, a o lea ua maitau atu o lea ua faatau mai e le Tulafono Tau Faaofi lea le faimalaga ese atu o tagata mai le tatou atunuu. Aua o le taimi nei pei o lea e ui atu i le Ofisa o Femalagaaiga, sosoo atu ma le Security i le Malae Vaalele i le taimi lenei, vagana le foi mai e ui mai i le Ofisa o Femalagaaiga, Ofisa o le Tiute, Ofisa o Faatoaga faatoa oo mai, a o lea e maitau atu i le Tulafono Tau Faaofi lea, o lea ua ui atu i le Ofisa o le Tiute. O le faafesili la poo le mea o le a le i ai le Immigration e pei o fafo, ae o le a ui sao atu lava i le Tiute ma o atu ai o tatou tagata.

O le vaega 2 o le faafesili lau Afioga i le Minisita, faafetai lava ua toe faatulafono fou le mea sa i ai le oloa faaulufale mai faasaina i totonu o le atunuu, e pei o laau malosi faapea foi ma laau faasaina, ia faafetai o lea lava e tumau i le tatou Tulafono Tau Faaofi fou lea ua aumai. A o le faafesili a lou sui usufono pe ua i ai ni tatou masini faaneionapo e foia ai nei faafitauli, aua e talitonu lava o lenei faafitauli e au mai i le taimi lenei. A o le fesili o lea ua faafou le Tulafono Tau Faaofi, o lona uiga ua tatau foi ona tatou laalaa i ni masini fou faaneionapo e ono sailia ai ma maua ai tulaga ia o le faaulufale mai o oloa faasaina e pei ona taua. O le isi itu lau Afioga i le Fofoga Fetalai o lea ua taua mai i le Tulafono Tau Faaofi lea le isi suiga lelei foi, atonu foi e talafeagai, o le aso lea ua tatau ai ona totogi le tiute po o le due date o le tiute pe a avatu i tua. O le Tulafono tuai sa tolu tausaga, o le Tulafono Tau Faaofi fou lea ua aumai nei o lea ua tasi le masina. I le vaai a lou sui usufono ua tatau ona i ai se fesoasoani mo i latou le aufaipisinisi ma le mamalu o le atunuu, e tele foi le latou sao i le tamaoiga o le atunuu, o lea ua pau mai lava i le tolu tausaga pau i le masina e tasi. O se pau ua maoae foi lenei pau, maumau e pe ana faapea e pau mai i le tolu tausaga ae tolu masina, a o le pau mai lea i le masina e tasi, ailoga e vave maua ni tupe e vave totogi ai tiute i le

masina e tasi, a o lea e tuu mai ai ma le isi vailiu o le Tulafono Tau Faaofi e faapea, “E i ai le malosiaga o le Pule Sili e mafai ona tuuavanoa atu.” O lona uiga la e le o i ai foi se faamaninoga mai le Tulafono Tau Faaofi po o gafea e oo i ai le pule faitalia lea a le Pule Sili, i lau vaavaai lea i ai. O lona uiga, a tuu foi la i le itu lea, o lona uiga, e toe oo foi i le tolu tausaga lea e i le Tulafono tuai, i lau lea vaavaai i ai i le faauigaina o le Tulafono Tau Faaofi lea ua aumai nei.

Ona ou oo mai lea i le isi vaega lea o amioga a le aufaigaluega a le Tiute. O lea lava e manino mai i le Tulafono Tau Faaofi lea, o lea e taua mai ma faamanuiaga po o rewards. O lona uiga a tatou faauigaina ia mea o rewards o mea faau mai foi lele, ua outou silafia, ae o lo o i ai ma le faaupuga, e mafai ona faataga e le Minisita ma le Pule Sili le vaega lea. E pei o le agaga lena o lau vaavaai i ai po o le a tonu le uiga tonu o lea vaega, ona o nei lava mea, o lea e silasila i ai tatou o Taitai o le atunuu, ina ia aua lava nei i ai se mea faanuminiina o le Tulafono Tau Faaofi. E pei o le agaga lena i lau vaai i ai, pe o le a le mea ua faataga ai o le permission a le Minisita ma le Pule Sili.

Ona ou oo mai ai lea i le vaega lea, atonu o se mea fou lea ua faatu mai o le Customs Appeal Authority po o le pulega o talosaga a le Tiute. Atonu o se vaega fou lea ua aumai i le Tulafono Tau Faaofi lea ua faatulai mai. I lau vaai i tiute o le authority lea, peiseai e faasino tonu i le faaiuga ua le talafeagai a le Pule Sili. I lau vaavaai i ai i le faatuina o le, e lilifa agai i faaiuga ua le fetai pe ua le talafeagai a le Pule Sili. Ae ou te talitonu lava au ia, e leai, e tasi lenei Matagaluega o lo o galue i Tulafono e pei o le Matagaluega o Leoleo. O lo o i ai lava le malosiaga o le Tulafono latou e faatino ai tiute a le Pule Sili ia ma le faagaioiina o ana tiute, a i ai se faaletonu o la e i ai le Afioga i le Minisita o la foi e i ai le Kapeneta e silasila i tulaga o mea faapenei. A o le popolega o lou sui usufono i le faatu o le mea fou lea, o tatou tupe alu, aua o lona uiga a silasila i ai i le mea lea ua aumai i i, e tatau ona Taitaifono ai se loia ia pei o le Faamasino. O lona uiga e le laititi se tupe e alu ai i le mea fou lea. O le vaavaai lena i ai. Ana aumai nei tupe e fuafua e fai ai le mea lea e ave i le aufaigaluega ia lava le aufaigaluega ina ia silasila totoa ma faatino le latou galuega i le maualuga e gata ai, ua aoga tupe ia, a o le toe fai o se isi vaega fou ona alu ai foi lea o isi a tatou seleni, o le itu lena o lea e popole ai lou sui, aua o lea o le a toe tilotilo foi i le isi mea e alu ai a tatou seleni.

O le isi itu, fai mai lava nisi i le aso ananafi i le isi Tulafono Tau Faaofi, se ua alu tele tupe i nei mea o loia i le taugata, ae o lea foi ua toe aumai e le Tulafono Tau Faaofi fou lea, o lona uiga la o le loia foi lea o le a taitaia le mea lea, a o lea foi fai mai isi ua taugata pili e alu i loia ma mea faapena. Ua ou fai atua lea tulaga, ona o lou lava agaga, o le agaga ina ia alu aoga a tatou seleni. O lou lava sui usufono, ou te le taliaina lea vaega fou o le Tulafono Tau Faaofi. Ma le agaga faaaloalo i lau Afioga i le Fofoga Fetalai.

O le vaega mulimuli, ou te le iloa i le Afioga i le Fofoga Fetalai pe talafeagai ona ou avatua i lenei taimi le isi vaega o le Tulafono Tau Faaofi lea ou te vaai atu i ai, i le Fuaiupu 1 lena e tau mai ai, o le Vaega 12(7) po o le subsection (7) ma le vaega 145(5). Ae a silasila i totonu o le Tulafono Tau Faaofi, e le o i ai le puipui (7) ma le (5). I lenei taimi ua ou avatua, ae lelei pea le avatu i luma o lau Afioga ma le Palemene ina ia... e le o i ai ni vaega faapena o i ai i totonu o le Tulafono Tau Faaofi, ai ua misi pe a, ina ia fai i ai se tatou fuafuaga ma se faaiuga. Ma le agaga faaaloalo lau Afioga i le Fofoga Fetalai.

FOFOGA FETALAI: Malo faafetai. Ia, tulai mai le sui usufono mo Faleata Sisifo.

Tofa LEALAILEPULE RIMONI AIAFI: Faafetai i lau Afioga mo le avanoa, faafetai foi i le Afioga i le Minisita mo lenei Tulafono Tau Faaofi. Faatoa ou vaai lenei i se Tulafono Tau Faaofi tele talu ona ou sau i totonu o le Palemene. A o le mea e faanoanoa ai, o le aumai i le aso ma le naunautaiga ina ia pasia le Tulafono Tau Faaofi, ae le o lava se taimi tatou te malamalama ai i le Tulafono Tau Faaofi.

Na saunoa le Afioga i le Minisita, e 37 tausaga o le Tulafono tuai. O lenei foi mea o le WTO ma le WCO, po o le Custom Organisation, e le o ni mea fou, ua leva ona exist, sa tatau ona lava le taimi. O le mafuaaga o lau tala lau Afioga, o le Tulafono Tau Faaofi fou lea ua aumai, e ogaoga ma tele suiga ua tuuina mai ai. Ou te le o iloa la po ua lava tapena le aufaipisinisi o e o lo o ave a latou oloa i fafo ma aumai oloa i totonu o le atunuu ma tagata lautele e malamalama ai i suiga fou ia o le a i ai ona e tele suiga fou ia ua aumai i le Tulafono Tau Faaofi. E tele faasalaga, tele malosiaga fou lea ua ave i le Ofisa o le Tiute e faamalosia ai. O le Tulafono Tau Faaofi e lelei, ae o le popolega lea i lou nei sui usufono.

Na saunoa se tasi o sui usufono, i tagata faigamalaga mai Samoa aemaise vaalele, o le taimi nei, o auunaga ia o lea e faatino e le Immigration toe faatino e le Pulega o Malae Vaalele i lalo o le latou Tulafono, tagata e o i fafo, e le gata i tagata faimalaga, a o uta, o vaalele, o mea uma, o mea ia o lea e faatino i lalo o le Tulafono a le Malae Vaalele, na o latou foi o i ai aoaga faapitoa ma le tomai e faatino ai le tiute lea. O lea la ua aumai i le Tulafono Tau Faaofi ma faapea mai le Tulafono Tau Faaofi, o lea o le a tauave e le Tiute. O le fesili la lau Afioga, o i ai nisi ua aoaoina lelei ma tapena lelei e faatinoina le tiute lea? E le faigofie, ae Samoa o se taimi e fesootai ai ma le Pulega o le Malae Vaalele, a o tusiaina le Tulafono Tau Faaofi, aua e tatau ona tele se sao o le Pulega o le Malae Vaalele i le tusiga o le Tulafono Tau Faaofi i vaega faapitoa lava ia, ona o matafaioi tonu ia o lea e faatino e le Malae Vaalele i le taimi nei. Ua oo lava i le alu a le vaalele, seiloga e avatu le clear a le Customs faatoa alu. O le taimi nei, na o le malae vaalele lava e i ai le final clearance a le vaalele e alu ai ona malaga ese ai lea. E leai se kilia i tua atu. O le mea la lea lau Afioga i le Minisita e tatau ona toe tomanatu i ai le Afioga i le Minisita ma le Tulafono Tau Faaofi.

O mea tau exports, ua matua tele le vaega o le Tulafono Tau Faaofi, o lea ua aumai foi aiaiga a le Ofisa o le Tiute ia, e fai e tagata e ave oloa i fafo. O le mea lenei, o lea ua leva ona galulue ma le Ofisa o le Sui Palemia ma isi foi Matagaluega a le Malo, a o lea ua atagia mai i i, e tatau ona avatu se i tuu i ai le seal ma se i faasinoina mai e latou le package ina o mea ma le faatinoina o nei mea uma. O le mea lea o lea e popole i ai ma atugalulu i ai le taofi. Sa ou faapea o mea lava ia e concentrate i ai latou, o oloa e aumai i totonu o Samoa. O le Tulafono Tau Faaofi, ua matua talafeagai se Tulafono Tau Faaofi i le taimi lenei, ona o lea ua alu le faamamafa a atunuu o le lalolagi, aemaise le Pasefika i le border control, le vaai o tatou tuaoi. O le mea lea e aoga ai le toe faatulai mai o le Tulafono Tau Faaofi lenei.

A o le mea la lea ou te talanoa atu ai lau Afioga i le Fofoga Fetalai ma lau Afioga i le Minisita o le Matagaluega, o le tele o nei aiaiga ma Tulafono, afai

e talanoaina ma pasia i le aso a taeao i le Palemene ma faamamalu, o le fesili la; ua silafia e tagata ma tapena i ai?

O nisi vaega ogaoga lea e i ai, e pei o fale teuolua, warehouses, o le a le toe tuua i le mea e masani ona i ai, e pule ai le Kamupani. O lea o le a lavea uma i lalo o le pule a le Ofisa o le Tiute i lalo o le faamalumaluga e pule ai le Ofisa o Tiute. Ua tapena la nei Kamupani tetele i nei ituaiga suiga tetele ma ogaoga ua faatuina mai i le Tulafono Tau Faaofi?

O vaega la ia lau Afioga o lea e tuufesili ai le taofi, ona e le gata i malosiaga faaopoopo, a o galuega faaopoopo ma tiute tauave faaopoopo, a o lea e maitau, e le o faaopoopoina se afaigaluega, ou te le iloa po ua tapena i ala tau aoaoga i le train ina o tagata faigaluega, ina ia mafai ona latou faatinoina isi galuega ia, na o e ua i ai le poto faapitoa latou te tauaveina ai. Lau Afioga, e 360 Fuaiupu o le Tulafono Tau Faaofi lau Afioga i le Fofoga Fetalai. O le naunautauga lea e i ai le tatou Malo, muamua, ia faafaigofie le faiga o pisinisi a i latou e taumafai e faatu pisinisi, ia faafaigofie foi le avega o oloa i fafo. O lea ua oo lava i le tau o oloa, le tau o mea mai fafo, e tataua ona ave uma i totonu i forms ma mea uma ua tuuina mai ina ia fai i ai se fuafuaga a le Matagaluega.

O le isi vaega taua lau Afioga, pe le o se taimi lenei e tagai ai lau Afioga i le Minisita ma le Malo, o lea ua ou vaai i le Tulafono Tau Faaofi i le Ofisa lenei o le Tiute, o se Ofisa tele tele, ua faaopoopo ana galuega tauave, aemaise lava i le mea lea tau border control, a o le Ofisa foi lea o lea ua tuu faatasi ma le Ofisa o Lafoga i totonu o le atunuu.

I lalo o le Tulafono Tau Faaofi lea, o lo o taua ai e le Susuga a le Comptroller of Customs, a oo la i le Tulafono a le GST, ona faaigoa lea o le Commissioner of Revenue, o le Tax Office po o le a. O ni Tulafono tetele, o se Matagaluega tele, pe ua le talafeagai i lenei taimi ona toe tagai lau Afioga i le Minisita ma le Malo e toe vaelua Matagaluega nei e lua, toe tumaoti. O Matagaluega aupito sili nei ona taua a le Malo, e ova i le 80% o tupe maua e faamoemoe tasi i le Matagaluega lenei. A o le tuualalo lena i le taimi nei, se i toe tilotilo i le realignment lea sa faatino talu ai, pe le o se taimi talafeagai lenei e fetuutuunai ai aua o lenei Tulafono Tau Faaofi ma lenei Matagaluega, e fai fuafua a latou galuega, e fuafua i international conventions, maliliega faava o Malo mai fafo. E fua foi i ai a latou galuega e tataua ona fai. A o le isi vaega lea tau tatou e pei o lafoga, e pei o mea lava i totonu o le lotoifale o tatou, a o vaega aupito sili ia ona taua o le Matagaluega i totonu o le tatou atunuu.

Lau Afioga i le Minisita, o nai tuualalo na, e le o tetele i lau Tulafono Tau Faaofi, a o nai vaega na se i tagai ifo i ai lau Afioga ina ia tapena mamao i ai ae le i faamamaluina. Ma le faaloalo lava.

FOFOGA FETALAI: Malo. Toe toatasi lava le sui usufono mamalu lea e tulai mai, se i onosai mai lava le Minisita toe toatasi lava le sui usufono mamalu ona tali aloaia ai lea o le Matagaluega.

Tulai mai sui usufono mo Gagaemauga Nu.2.

Tofa LEVAOPOLO TALATONU: Faafetai i lau Afioga i le Fofoga Fetalai mo le avanoa. E leai e puupuu lava se manatu, e ui lava ina tele le Tulafono Tau Faaofi, ae soia ia ona ua finagalo lau Afioga i lea tulaga o le faavavevave. Ae pei lava ona saunoa nisi o sui usufono, o le Tulafono Tau

Faaofi lenei o le Tulafono Tau Faaofi e faamoemoe i ai le atunuu i le aoina o ana tupe maua. Ma o se Tulafono Tau Faaofi la sa tataua ona matua lava se taimi tele ina ia malamalama ai au nei faapea foi nisi o sui usufono mamalu e avatu ai fautuaga ma tulaga uma. Ae atonu lava la e i ai foi se taimi tatou te o ma agai i luma ma fai tatou amendments.

Ae i ai le vaega lea lau Afioga i le Fofoga Fetalai ou te fia tautala i ai, e matua teena e lou sui usufono se tasi o vaega o le Tulafono Tau Faaofi. O le Fuaiupu 16 lau Afioga i le Fofoga Fetalai, o lo o faaulutalaina i le faa-Samoa – O faamatalaga molimau e faamaonia ai se solitulafono. O le faapapalagi lea e i ai po o le faa-Peretania, o le burden of birth. Lau Afioga i le Fofoga Fetalai, o lea ua ou faitau atu nei i le Tulafono Tau Faaofi, o le taimi lava e tau faasolitulafonoina ai e le Ofisa o le Tiute se tagata po o se kamupani, ua faamaonia le solitulafono, se i vagana ua alu atu le tagata e avatu ni ana faamaumauga e taumafai ai e le o i ai se solitulafono ia te ia. Ae a silasila lau Afioga i le Fofoga Fetalai i le Faavae, o le mea lena na ou fai atu ai ou te teena, ona e violate e le clause lea o le Tulafono Tau Faaofi le Fuaiupu 9 o le Faavae. O le Fuaiupu 9 lea e i ai i le faa-Peretania, “9(3) Every person charged with an offence shall be presumed innocent until proved guilty according to law.” A o le mea lea e aumai i le Tulafono Tau Faaofi a le Custom, ua e guilty, unless e alu atu le defendant e avatu ni ana faamaoniga e prove ai lona innocent. O le mea la lea e avatu ai le fautuaga i lau Afioga i le Minisita, se i toe tagai tasi ifo lava i le vaega lea o le Tulafono Tau Faaofi, ona o lea ua feteenai le Fuaiupu lea o lau Tulafono Tau Faaofi ma le Faavae o le Malo o Samoa. Faafetai mo le avanoa.

FOFOGA FETALAI: Malo. Ia, se e ava tele atu lau Afioga i le Tuiatua Faanofonofu. O le a avatu la le avanoa mulimuli lea mo oulua ma le sui usufono mo Faleata Sasae ona tali ai lea o le Minisita.

Tulai mai le sui usufono mo Aleipata Itupa i Lalo.

Afioga TAFUA MALUELUE TAFUA (Aleipata Itupa i Lalo): Faafetai lava i lau Afioga i le Fofoga Fetalai. E leai se agaga e faatosotosololoa le tatou mataupu aua e maua lea le manatu ua uma ona soalaupule lenei mataupu ananafi i le faamalamalama a le Ofisa Sili o Pulega o le Matagaluega o Tupe Maua. E ui i lea, se i ou tulai atu e fesoasoani i le Tama Matua, aua ua uma foi le la Itu ua leva ona tata latou, ae se i talitua tasi tatou. O lea la ou te tulai atu ai ma le agaga faaloalo lau Afioga i le Fofoga Fetalai, se i mulimulitai foi i nai vaega o le Tulafono Tau Faaofi.

E momoli atu lava le agaga faafetai i lau Afioga i le Minisita mo Tupe Maua faapea foi le Matagaluega e tusa ma lenei Tulafono Tau Faaofi taua. E pei o lea e manino le Tulafono Tau Faaofi, o le Tulafono Autu lava o lea e i ai uma i totonu o le Tulafono mafiafia lea e silasila i ai. Ona pau lava nai vaega lea e faaopopo i ai i le Tulafono Tau Faaofi i lau lea faitau, o le Fuaiupu lea 11 e tau i le 20, ma o lea foi e manino mai lava, o lea tatou te mulimulitai lava i faiga faavae. Ae le gata i lea, o lea foi e fai ma tatou saina i le feagaiga a atunuu i fafo e tusa ai ma le tulaga o tiute po o le WTO e pei ona taua e nisi po o le WCO foi, a o lea e i ai le tatou sainiga ma le KYOTO Protocol, o le tasi lea vaega atonu e aoga ai foi lenei Tulafono Tau Faaofi i ona vaega e faaopopo i ai. Ae le gata i lena o le Fuaiupu 11 e tau i le 20, o lea foi e taua e nisi e i ai le vaega o le Custom Control Area lea faapea e 30 aso e taofia ai

mea o oloa i totonu o temporary area lea a le Tiute ona omai lea o latou togitogi le tupe i totonu o le 30 aso ae avatu i tua a latou oloa. E i ai lava foi faiga e mafai ona fetuutuunai, atonu o le ala lea o lou tulai atu lau Afioga i le Minisita, na o se tuualalo, pe i ai se vaega o le Tulafono Tau Faaofi, o lea ou te vaai o lea e i lalo o le Vaega 60, e i ai le discretion a le Minisita i le fautuaga a le Ofisa Sili o Pulega o le Matagaluega.

O lau tuualalo la lau Afioga, o le aoga ia o le vaega lea pe a faapea e mafai ona fesoasoani i tatou falesa, aemaise lava le tatou atunuu fai mai e faavae i le Atua, toetoe lava a leai se nuu leai se itumalo e le fauina ni falesa po o ni maota o faafeagaiga. Masalo a tau manatu lau Afioga, na ou tolotolo atu i le matou falesa mo se fesoasoani, e le o se fesoasoani faapea e aua ne i faia le Tiute, ae o se fesoasoani e togitogi le tiute. O le vaega lea sa tatau ona i ai se vaega i totonu o le Tulafono Tau Faaofi i se discretionary power a le Minisita e fuafua ai ma togitogi le tiute, e le faapea e aua ne i faia le tiute ae ia togitogi pea le tiute ae togitogi malie fuafua i le malosi o le aulotu ma o tatou tagata.

O le isi vaega lau Afioga ma le faaaloalo, o le suiga fou lea pei ona taua o addition of powers o Customs Officers, o lea ua faapooopo o latou tiute. Ma e taua tele lea mea mo le tatou fonotaga lea o lo o loma nei i le SIDS, aua a silasila totoa i ai, tasi lea vaega taua e malaga mai foi Peresetene ma Palemia ma Minisita o atunuu i fafo ua mautu ma ua lelei, ma e talafeagai lenei Tulafono Tau Faaofi pe afai tatou te naunautai ina ia pasia mo fuafuaga ia o le taofiga o pasese masalomia. O lea e silasila i ai o lea ua taunuu mai le vaega o le Bomb Squad a leoleo mai Niu Sila e fesoasoani i le tatou atunuu mo le pui puiga lava o tatou taligamalo. O lona uiga tasi lea vaega sili ona taua ma aoga pe a tatou silasila totoa i lenei Tulafono Tau Faaofi. E le tele ni suiga o i ai, pei ona taua ananafi, o le Tulafono o le 1977, o lea lava e i totonu o le Tulafono Tau Faaofi lenei. Na pau lava le Vaega, o le vaega lea mai le Fuaiupu 111 i le 249, lea e i ai le Customs Appeal Authority lea sa taua e se tasi o sui usufono ua uma ona saunao. E le gata foi i lenei, a o le aoga foi o lenei Tulafono Tau Faaofi, o lea e ogatusa ma manaoga faavae o Malo pei ona taua foi i lalo o le Fuaiupu 294 e tau i le 305, o public consultation. Ua uma ona fai a tatou feutanaiga ma private sectors, o Government Ministries ma tagata uma stakeholders e talafeagai ma lenei Tulafono Tau Faaofi. O lona uiga e leai se mea faapea e le i silafia e le aufaipisinisi, o la e ua silafia uma lava. Ua silafia foi e le toatele o le atunuu.

Na pau lava le issue po o le vaega lea ou te fia fautua atu ai i lau Afioga i le Minisita ma le faaaloalo, o le tatou temporary custom warehouse, po o le a le saogalemu o i ai, ae po o lava se vaega ua faapitoa mo lea vaega, i sau ai foi se tuualalo a nisi pe collude nisi o tatou Matagaluega, ona faaletonu ai foi lea o le mea toe foi i le, back to square one. E pei o le agaga lea ma le faaaloalo lau Afioga, ae faafetai lava mo le Tulafono Tau Faaofi, e matua talia ma le fiafia, e talia ma le faafetai, ma e talia foi e lou sui usufono. E talosaga atu ai i le paia ma le mamalu o le tatou au usufono, ia tatou alofagia le Tulafono Tau Faaofi a le Tama Matua o le Palemene ae pasia i lenei aso. Ma le faaaloalo.

FOFOGA FETALAI: Malo. Ia, tulai mai le sui usufono mo Faleata Sasae, o le avanoa mulimuli lea.

Tofa AVEAU TUALA LEPALE NIKO PALAMO: Faafetai i lau Afioga i le Fofoga Fetalai. E le umi foi se manatu, e talia foi le Tulafono Tau Faaofi.

Aua pei ona saunoa se tasi o sui usufono, e matagofie ma malamalama le saunoaga a le Tamaitai Pule ananafi, ma ua iloa ai foi se malamalamaaga i lenei Tulafono Tau Faaofi tele. Sa i ai lou agaga faapea ai a tuu mai se vaitau e tau faitau ai le Tulafono Tau Faaofi. Ae ui i lea, o lea lava e malamalama le faamalamalamaaga pei ona faamalamalamaina e le Tamaitai Pule ananafi. Ae i ai la se vaega lea o le Tulafono Tau Faaofi ou te fia tautala i ai.

O le vaega muamua, o le Tulafono Tau Faaofi lenei, tusa o le Tulafono Tau Faaofi lenei ua i ai le puipuiga so o se mea e oo mai i totonu o Samoa. E le gata i lena, a o so o se mea foi i totonu o Samoa. O le faataitaiga; o tagata feoai, o tagata o lo o nonofo i Samoa, o tagata e omai Samoa, o tagata e o i fafo ma Samoa, e pulea ai laau, so o se laau, po o so o se ituaiga vaega e oo mai i totonu o Samoa, o oloa, o manu, o meaituaolo, o mea uma lava e oo mai i totonu o Samoa, e oo foi i le soifua maloloina o tagata Samoa, e i totonu o le Tulafono Tau Faaofi lenei. O le mea la lena e ala ai ona ou talia lenei Tulafono Tau Faaofi, ae sa i ai lou manatu, e tataua ona tuu mai se avanoa ona o le taua o le Tulafono Tau Faaofi lenei. O le Tulafono Tau Faaofi lenei o lea e iloa, po o le a lava se mea i totonu o Samoa, o lea ua aumai le puipuiga i totonu o le Tulafono Tau Faaofi lenei.

E i ai la vaega nei o le Tulafono Tau Faaofi sa ou fia tautala i ai. O le vaega muamua, lea sa faamalamalama ananafi le vaega foi lea warehouses ia o le a faatino e le aufaipisinisi, seiloga e avatu ai le laisene. O le mea la ou te fia malamalama ai i le vaega lea, pe afai e fai le laisene a au e faia le warehouse lea o le a approve e le Custom, o le a taua e le Custom o nofoaga suesue a le Ofisa o Tiute, e mafai ona tuu ai ma ni oloa a se isi faipisini i totonu o le warehouse a le tagata faipisinisi lea? E mafai ona tuu i ai i totonu i i, po o le vaega lea o oloa e tuu lava i tai i le mea masani?

O le vaega lona lua ou te fia talanoa ai i le Tulafono Tau Faaofi lenei, o le power lea ua ave i le Custom Agents, i tagata ia e faigaluega i le Custom. E taua tele le vaega lea. E pei ona saunoa se tasi o sui usufono, o lea ua i ai i i le feteenai ma le Immigration i le vaega lea. E i ai vaega o le Tulafono Tau Faaofi o lea e faapea mai, e feutagai le Pule o le Custom ma le CEO o le Matagaluega a le Palemia. O lona uiga e i ai le vaega lena, ae le gata i lena o le vaega a le Matagaluega o Faatoaga, lea e i ai i totonu o le Tulafono Tau Faaofi. Ae i ai lava vaega ia o le puipuia o tagata e omai totonu o Samoa, mea ia pei ona faatino nei e le Immigration, po o le a tonu lava le vaega lea o le a faatino ai lea vaega.

O le isi vaega ou te fia talanoa i ai, o le vaega lea ua ave i le vaega lea o le Custom Agents ia, ave i ai le power e mafai ai ona faatino se suesuega e aunoa ma se warrant. E i ai le vaega o le Tulafono Tau Faaofi o lo o tuuina mai i i, e mafai e le vaega lea ona entry by force, faaoga le power po o le malosia e mafai ai ona ulufale i totonu o taavale, totonu o fale, totonu o vaa, totonu o vaalele, e aunoa ma se warrant. E taua le Tulafono Tau Faaofi lenei pe afai o se mea e tupu i se taimi vave, ae i ai lou talitonuga mo le puipuiga o le atunuu ma le puipuiga o aia tataua a tagata taitoatasi, e tataua lava ona faatino se vaega faapea ina ia ave ai le avanoa i le tagata lea o le Custom Agent e faatino ai le galuega lea.

E i ai le vaega lea e sau i le Tulafono Tau Faaofi, e mafai e se vaa a se Custom ona fana pe fire se isi vaa foi lea pe a fiu lava e fai atu e faatali mai, a o la e alu lava le vaa. Pe fiu foi e tuli a o la e alu lava le vaa. O lo o sau i le

Tulafono Tau Faaofi, e muamua fai se warning, se mea foi lea e fana i luga i le ea.

O le vaega lona lua, a le tu lava ia fana loa le vaa pe fana totonu o le vaa lea e sau iinei i le Tulafono Tau Faaofi. O le tasi lea vaega e tatau ona tagai i ai po o lava sauni le Malo e faatino vaega ia e puipuia mai ai tagata faigaluega nei o alo ma fanau a le atunuu o le a faatinoina lea vaega ona e taua tele le vaega lea.

Ona o aso ua mavae sa i ai se vaa na tu i le itu lea, sa talanoa ai i se tasi o Malu o le Malo sa ia faapea mai, “Ina ua o Leoleo e osofai le vaa lea, na iloa ai e sili atu le tele o meatau la e i totonu o le vaa i lo mea ia e o atu ma Leoleo.” O le popolega la lena o lou sui usufono ina ne i fana atu e le tatou vaega lea e o atu, ae liliu mai le vaa le la faatamaia. Po o lava sauni la i ai tatou i le itu lea ona e fai sina matuia o lea vaega, a o mea faapenei e tatau lava ona i ai se tatou vaa foi lea e pei o vaa foi ia i Amerika e mafai ona faia lea vaega i itu faapenei.

O le isi vaega ou te fia talanoa ai i le Tulafono Tau Faaofi lenei lau Afioga i le Fofoga Fetalai, o le itu lea i le puipuia o borders taitasi. Afai ua ave le malosiaga lea i totonu i le custom e puipuia ai borders a tatou, e ao ona galulue faatasi ma le Health. O le faataitaiga o faamai eseese ia e oo mai i totonu o le atunuu ma e taua tele le galuega lea a le Matagaluega. O le Matagaluega foi lenei masalo e pei lava ona saunoa nisi, masalo pe 80% le tupe o lo o ao mai ai a le Malo, o le Matagaluega lenei o lo o faatinoina ma e tele foi tupe e faaono maua mai ai. O le tuutuuga la lea ua sau nei i le aveesea mai lea o le tolu tausaga ae faatino le vaega lea ma le suiga o fale ia o warehouses ua tuu i lalo i laisene a le Custom, e matua talia ma le fiafia e lou sui usufono ona o se tasi lenei vaega e le gata o le a vave ona maua le tupe e faatino ai galuega a le Malo ae faapena foi galuega a Matagaluega. O lea ua maua le avanoa ona tagai foi lea i ai o kamupani e fua foi mea e auina mai i le Tulafono o lo o i ai nei. E le toe tele ai foi la ni galuega a le tatou Ofisa.

Ona pau ia o nai mataupu sa ou fia tulai atu ai e momoli atu ai lau faafetai i le Afioga i le Minisita mo lenei Tulafono Tau Faaofi aemaise le Matagaluega. Ma lou faaaloalo lava.

FOFOGA FETALAI: Tulai mai lau Afioga i le Minisita e a ia le Tulafono Tau Faaofi e tali mai i fesili ona tatou faasolo loa lea mo le lauliliuina o lenei Tulafono Tau Faaofi.

Tulai mai Hon Tuiloma Lameko.

Tofa Hon TUILOMA LAMEKO: Lau Afioga i le Fofoga Fetalai faapea foi sui usufono mamalu o le Maota, ou te muamua ona momoli atu le faafetai i sui usufono ia pe toaono ea pe toafitu ia na faaalua o latou manatu i le Tulafono Tau Faaofi. O le a ou tali atu i le tulaga i le aotelega o le Tulafono Tau Faaofi e aafia ai nisi o itu na laga e sui usufono mamalu o le Maota.

Lau Afioga i le Fofoga Fetalai, e le mafai ona alofia, o le ki lea po o le faamoemoega lea o lo tatou atunuu lea e i le tulaga o le maua o tupe e faagaioi ai lo tatou Malo, e silia ma le 80% tupe e aumai i totonu o le Ofisa o le Tiute. O lona uiga ua tatau ai ma onomea ona vaai totoa le Pulega ma le Malo i se tulaga e mafai ai ona faasaoina tupe mai le faaoga sese e tagata po o nisi foi e oo atu e fia aveina a latou oloa i fafo.

O le tulaga o lo o i ai nei, e pei lava ona ou taua ua silia ma le 30 tausaga talu ona fai le Tulafono tuai. O se taimi umi tele ma o lona uiga e tele foi taimi e tatau ai aua o le taimi lenei, ua tele faalapotopotoga. E pei lava ona ou taua i lau faamatalaga, o le autu o lo o i ai, o le suiga o le Tulafono o le 1977. O lona uiga o le tele o mea o lo o i le Tulafono lenei, e ui ina fesui ai igoa ma mea o lo o i ai, a o le tele lava o mea sa i ai i le Tulafono o le 1977. O lona uiga la o le toe faamalosiga o le Tulafono Tau Faaofi lenei lau Afioga i le Fofoga Fetalai ma le mamalu o le Palemene, o le taumafai lea ia faamalosia le Matagaluega, o Faalapotopotoga ma tagata ina ia totogi tiute o a latou oloa. Lau Afioga i le Fofoga Fetalai, e leai se tulaga e faapea e naunau ai ina ia aua ne i totogia ni tiute, ae vagana le tulaga o lo o tatou i ai nei.

O le tulaga o lo o i ai nei aua o au o lo o faafesagai i taimi uma aemaise lava lo tatou atunuu. O lea lava e taumafai ina ia maua se avanoa e mafai ai, e le o le avefua o oloa a Faalapotopotoga, nuu po o malaga a nuu, e le o taumafai faapena. O lo o taumafai i tagata ia e faimalaga e tuu i ai se avanoa e totogi ai tiute o a latou oloa pe afai e faaono totogi ni tiute. Aua o nisi lava o le au faimalaga a lo tatou atunuu e faapea e le totogia ni tiute ona o le tulaga i le Tulafono.

O le isi vaega o lo o taua, o le tulaga lea e faapea ona e i ai tagata e faapea e faaono ave e Agents ma le totogia ni tiute. Lau Afioga i le Fofoga Fetalai ma le mamalu o le Palemene, e leai se mea faapena o i ai e faapea e avefua ai ni oloa, e leai. Ae se i vagana ona o la lava e i ai tulaga aiaia e pei la o ni malaga a ni nuu e malaga ai i fafo. O personal effects o la e tusi lava i totonu o le Tulafono, o personal effects o mea sa e faaogaina i se mea sa e i ai, ona e toe sau lea ma aumai i inei. O mea na e decide la i le Ofisa o le Tiute pe tatau ona totogi se tupe mo le tiute.

O le tali atu la lona ma le faamalamalama i le tulaga lautele ma o ou manatu na i vaega taua ia sa lavea i saunoaga a le tóatele o sui usufono aemaise sui usufono sa saunoa e faatatau i le Tulafono Tau Faaofi. A o le Tulafono Tau Faaofi lava ia, e mafai lava ona toe fesui ai i se isi taimi, a o le taimi lenei ua manaomia le fai o le tatou Tulafono lea e totogi ai tiute ina ia maua ni tupe e fai ai o tatou auala a o le i faia le palota.

Tofa Lealailepule Rimoni Aiafi: Faafetai lava ona e ava tele i lau Afioga i le Minisita, e le toe faafinauina foi le tele o mataupu. Ona pau lava le mea lea e fia fautuaina ai lau Afioga i le Minisita, o le vaega lava lea leaga o lea e maoti i le Tulafono Tau Faaofi, o le va lea o le nonofo ai o i latou ma le Pulega o Malae Vaalele aemaise o tagata e malaga i fafo leaga o lea e manino mai i le Tulafono Tau Faaofi o lea o le a faatino e latou vaega ia o lo o faatino nei e le Pulega o Malae Vaalele, ae e tatau ona i ai se fesootaiga po o a tonu vaega e faatino e i latou. Aua leaga o lea ou te tilotilo i le Principal Act talu ai, e le o i ai malosiaga ia ona o malosiaga fou malosiaga ia, ae faafetai i lau Afioga i le Minisita.

Tofa Hon TUILOMA LAMEKO: O le tulaga sao lava, e tatau ona galulue faatasi le Ofisa o le Tiute ma le Ofisa o Femalagaaiga aua e tofu uma vaega ia ma le Tulafono. E le mafai la ona faapea atu e fai atu le isi Tulafono e talepe ai le isi Tulafono. Afai o la e i ai i le Tulafono a le Tiute e tatau ona totogi se tupe i le vaega lea, e tatau. Ma le faaaloalo lava.

Tofa LEVAOPOLO TALATONU: Lau Afioga i le Fofoga Fetalai, e le umi foi se faamatalaga. O le mataupu lea sa ou taua o le a taatia atu pea i le Afioga i le Minisita aua o la e fai mai e alu alu lava i se isi taimi toe fai mai ma toe fai foi. Se i vaai ane lava i le 285 lau Afioga pe a tuua lotu i lenei Aso Sa.

Tofa Hon Fonotoe Nuafesili Pierre Laufo: Lau Afioga i le Fofoga Fetalai, o le Fuaiupu 285 e tau sao ai ni faamatalaga e so o se itu lava. O le Itu Tagi, Itu Tetee, o le Malo po o se tagata ua molia. O le mea la lena e tau ai faapea o le presumption, ona lisi mai lea i le 285 o presumption ma o mataupu e agai tonu i ai le presumption e amata mai i le (a) seia oo i le (f), a o le tulaga ia i le burden of proof e pei ona fesiligia e le sui usufono po o le standard o le beyond reasonable doubt o lena e i lalo o le (f) o le 285 ma e tumau lava i luga i le prosecution le standard of proof lena ia faamaonia e le prosecution.

O lona uiga la e le o i ai se feteenaiga o le Fuaiupu 285 ma le fuaiupu o le Faavae lena e aumai ai le presumption of innocent until proven guilty. Ia leaga o lea e pei ua agai faaloia mai Levaopolo i le mataupu lea o lea ua tali atu ai i le tulaga lena. Ma le faaloalo, e leai lava ma se feteenaiga o i ai.

Tofa LEVAOPOLO TALATONU: Lau Afioga i le Fofoga Fetalai, ua ou faanoanoa lava i le loia a le Sui Palemia, a o le a le afaina o le a ta toe talanoa ai i se taimi i le mea lena.

FOFOGA FETALAI: Se i tulai mai Manua, pe i ai se mea o finagalo ai?

Afioga Hon Manualesagalala Enokati Posala: Lau Afioga i le Fofoga Fetalai, ona o lea sa laga le tulaga i le malae vaalele.

O lea e faamaoti mai iinei le Tiute ia ma lana Tulafono o lo o i ai, e le feaiaai ma le Tulafono a le Pulega o le Malae Vaalele ma ana foi fuafuaga o lo o i ai. O Tulafono nei ua leva foi ona faataatia mai ai i talanoaga sa fai ma galulue faatasi ai SOEs ina ia manino matafaioi ma tulaga o lea e agai i ai le Tulafono. Ou te iloa la e le feaiaai le tulaga lea ona o la e aumai le Tulafono a le Tiute ia i le vaai i tiute, a o lo o i ai foi Tulafono a le Pulega o Malae Vaalele mo le saogalemu.

FOFOGA FETALAI: Faafetai le fesoasoani mai.

Tofa Lealailepule Rimoni Aiafi: Lau Afioga i le Fofoga Fetalai, ou te fautuaina le Afioga i le Minisita, e sili pe a oulua talanoa pea ma le Minisita leaga o lea na ma talanoa nei ma le Pule Lua o le Malae Vaalele lea e i ai iinei, sa ou fesili i ai pe sa i ai se latou fetuunaiga ma sa ou faaali i ai le vaega lea o le Tulafono Tau Faaofi. O le mea lea e fautuaina ai lau Afioga i le Minisita, leaga a faitau foi i ai i le Fuaiupu 31 e tau i lalo, e tatau i so o se tagata e malaga i fafo ona ave lana ato. O mea uma lava lea e faatinoina nei, o mea na o lea e faatino e le Tiute. O le vaaiga o ato, o le vaaiga o tagata e malaga i fafo ma mea uma lava.

Ma le faaloalo lava.

FOFOGA FETALAI: E manatu ua.....

Afioga Hon Palusalue Faapo II: Lau Afioga i le Fofoga Fetalai, sa ou tulai muamua atu ae ua e le tuuina mai se avanoa.

FOFOGA FETALAI: Se malie Palu, silasila foi e manino lava.....

Afioga Hon Palusalue Faapo II: Ua ala ona tatou fetotoai ona o le Tulafono Tau Faaofi lapoa lenei.

FOFOGA FETALAI: Malie lau Afioga i le Taitai o le Itu Agai. E manatu o lo o manino ma malamalama le tatou Semina ananafi. O lea foi sa outou faafofoga toetiiti alu le itula atoa o saunoa le tamaitai o le Pulega o le Matagaluega ma sa tatou i ai uma. E fa, lima consultation tetele na fai ma le atunuu. O le mea foi lea e i ai atugaluga o le sui usufono e pei ona saunoa i ai Lealailepule, o lea foi ua taatia atu le fautuaga, o le mea e fofu malie i le va o le Pule o le Matagaluega o Tiute ma le Pule Sili o le Pulega o Malae Vaalele, ae e le o se mea lena a tatou e toe faia. That is their job. O latou e consultate ma fuafua po o fea le isi Tulafono e ufiufi ai le isi Tulafono. E manatu le agaga ma le faamoemoe o lea foi ua tuuina mai le faatagaga a Lana Afioga Mamalu O Le Ao o le Malo ona o le Tulafono Tau Faaofi lenei e matua aafia tele i a tatou taliga malo ia o le a fai. O le ala lena o le tuuina mai o lenei Tulafono Tau Faaofi taua ma o lea ua saunoa faamalamalama le Afioga i le Minisita. O le Tulafono Autu o le 1977, o le tele o le Tulafono masalo o le 80% o le Tulafono lea e i totonu iinei, a o le faaopoopoga, ona ua tatou aafia tele i faiga filifiliga ma faiga a Malo mai fafo. O lea ua tatou laalaa i luga o le faamapueina o le tulaga o le faatamaliaga o le Matagaluega o Tiute.

Na faamaonia le lafo ma faitauina le Tulafono Tau Faaofi o le Ofisa o Tiute 2014 i lona faitauga faalua.

FOFOGA FETALAI: Ia ou te manatu o lea ua tatou taunuu tonu lava i le tatou taimi malolo i lenei aso. E momoli atu le faafetai tele i le paia ma le mamalu o le tatou Maota, o lea foi o le a tatou sauni e faitau auiliili lenei Tulafono taua ua i luma Maota o lenei aso, ae manatu ua tataua ona fai se tatou malologa. E lelei foi le tatou sailiili malosi o taeao le tatou aso Fono, ia ua maea foi atuvasa i le tele ma le anoanoai o tuatuaanoa i lenei aso sa outou feagai ai, e manatu foi ua sau le tamaloa mai Lepa, ua tataua ona tatou malolo ma sailiili malosi i tulaga o le tatou soifua maloloina, ona tatou toe potopoto ai lea iinei i le aso a taeao aua le faaauauina o le tatou galuega.

Mo le silafia o taeao o le a faatauto aloaia ai le tatou sui usufono fou, o le aso o lo o ua faauma ai tulaga o tapenaga a le Ofisa o Faiga Palota ma tuuina mai le ioega aloaia a Lana Afioga Mamalu, O Le Ao o le Malo, o taeao o le a momoli aloaia mai i o outou luma le sui usufono mo Gagaiformauga Nu. 1, le Afioga ia Faimalotoa Kika Stowers, ia ma tatou faafeiloai i tulaga aloaia ma faaulufale ma faanofo i lona nofoa e tataua ona i ai aua le fesoasoani i le soalaupuleina e toe atoa ai pou o le tatou Maota e 49 sui usufono o le tatou Palemene.

O le agaga lea, ia atonu foi e toe oso le ia o le fau i le aso a taeao, momoli ai lo outou soifua ma lo tatou ola, ina ia tatou aulia ma le manuia.

Ae le i faaiuina le tatou Fonotaga i lenei aso, ou te valaau atu i le sui usufono mo le Vaa o Fonoti e faaiu mai le tatou Fonotaga i se tatalo ona tatou malolo ai lea.

Na tolopo Taulumaga a le Fono Aoa o le itula e 1:06 i le aoauli, seia aulia le itula e 9:00 i le taeao o le Aso Lulu, 20 Aokuso 2014.